


# MUNTU ÛNYEEMA

## BWIKADI BWÀ MUKALENGE

 Twinyikàayi mitù yètù. Nzambi munanga, tudi ne disànka mu mapingaja emu bwà dyèsè edi ditùdi naadi dyà kudisangisha musangu ewu kàbidi. Ne Wèwè nkààyèèbè, Mukalenge, ngudi mumanyè mùvwà myoyi yètù mijingè bikolè dîbà edi ditùdiku mwà kwimana cyàkàbidi kumpàlà kwà cisàmbà Cyèbè kaaba aka, bwà kutwàla Mukenji ewu wutùdi tuumvwa ne mwoyi mujimà ne ngwà lùkàsàlùkàsà mu dîbà edi ewu. Wèwè ngudi mutùkòsèle ndambù wa matùkù aa mpindyewu, nènku tudi tulòmba, Nzambi munanga, bwà cyanza Cyèbè cyà luse cùkalèku pambidi pèètù, bwà kutùlombola ne kutùludika. Nènku tùpèèshèku bintu bitùdi naabi lukèngelu abi, Mukalenge, bwalu myoyi yètù yidi yìjinga kuKumanya bimpè menemene.

<sup>2</sup> Tudi tumòna budimi bunènè bwà dinowa, butòòke, bintu bibobè, ne tudi bamanyè ne ntete yidi pabwìpi mpindyewu bwà cikondo cyà butùmbi cyà dishiipula. Nzambi munanga, tudi tulòmba bwà Ùkangulèku bizubu mu nyùngulukilu wetù, twètù tùdyàdijèku mu Bwikadi bwà Mwànà mpindyewu, mu ndambù wa matùkù àdi àlondà aa, ne túbobè bwà Bùkalenge bwà Nzambi.

<sup>3</sup> Wabèleshakù musambu wònsò wìmbiibwà awu. Wabèleshakù disambila dyònsò, ne wàndamunakù dyònsò dyàsambidiibwà adi, Mukalenge. Sùngilàku bajimìne bònsò. Bùkilàku bwà kwaluja ku nzùbu wa Nzambi udi ne mwoyi, ne ku bwobùmwè, aba bàdi balalàkàne abu.

<sup>4</sup> Tudi tulòmba, Nzambi, bwà Wèwè kwondopakù mubèèdi yònsò udi ulwa mwinshì mwà musàkà wètù ewu. Enzàku nàнку, Mukalenge. Swàku bwà kakwikadikù muntu ne butekètè munkaci mwètù ku ndekeelu kwà masangisha aa to.

<sup>5</sup> Nènku, Nzambi munanga, pashiishe bwètù twètù biinè, twètù bàdi bàmba mu dîbà edi mutùdi Èkèleeziyà, Babiikila bwà kupàtuka, aba bàà pa buloba bujimà bàdi bapàtùke mu Baabùlònà ne bwà kwikala baabanyanganyi bàà bwobùmwè bulenga ebu mu ditùkù dyà ndekeelu edi abu, tudi tulòmba, Nzambi, bwà Ùbenèshèku myoyi yètù mu mùshindù wà dikèma. Tudi bulelèlè ne nzala, Mukalenge, ne badishiye munda mutupù ku bintu byònsò byà pa buloba, bitùdi bamanyè abi. Mukalenge, nyewù twatèèki ku luseke bujitu ne bujitu bwònsò budi butùjingila bipeepèlè nùнку ebu, nènku mpindyewu tùnyeemèku ne lutùùlù lubilu elu, lùdi lutèèka kumpàlà kwètù

elu. Enzàku nàнку, Taatù. Ne swàku bwà twikalè batàmbe kuula, batàmbe kwikala ne makàndà, beena Kilistò batàmbe bwîmpè, ku ndekeelu kwà disangisha edi, kutàmba mutùvwà patwàbwedi apu. Nzambì àpetèku butumbi bwònsò, bwalu tudi tulòmba nùнку mu Dìnà dyà Yesù. Amen.

<sup>6</sup> Ngeela meeji ne edi ndyèsè dinène, dilòòlò edi, dîmvwà mwindile kùkaadi cikondo kampànda. Ditùkù adi mwawa ndondela mukàjàànyì, ngamba ne: “Ntu ndwa mubindùlùke bikolè byà menemene, pântù mwindile bwà kulwa ku tabernacle.” Ndi ànu. . . Ndi ne balundà bakwàbò, mu bushùwà bwà bwalu, ndi naabò, pa buloba bujimà, kàdi kùdi cintu kampànda pa bìdi bitàngilà tabernacle ewu kaaba aka.

Ntu mwangata ku lupwishi lùdi apa elu, pààkampèèshà Nzambì mwoyi pa buloba apa; ne ndi ngeela meeji ne, bu Yèyè mwà kunènga, nènjiikiibwè kaaba aka mwaba kampànda. PààlwàYe, neÀnsangàne apa mwaba kampànda.

<sup>7</sup> Kàdi, mbyenzè ànu bu ne, kùdi cintu kampànda, pântù mbanga kwela meeji pa Jeffersonville. Ditùkù adi ngàkadyùmvwa nkààyaanyì be; mèmè kwambila mukàjàànyì, kwamba ne: “Ndi ne majiyà, kàdi ncyèna mumanyè ne majiyà àndi naawù ngàà cinyì to, ànu byòbì ne bantu abu mbàdi munkaci mwà kusambila bwanyì mèmè.” Mèmè ne: “Èè, nèngiikalè. . . Cintu cimwèpelè cyà dyenza cîndi mumanyè ncyà kwalukila ne kwenzakù masangisha ndambù wa matùkù, kumòna ní katwènakù mwà kupeta cintu kampànda kùdi Mukalenge, pàmwàpa mMuswè bwà twètù kumanya cintu kampànda.”

Nèнку cyena-bwalu cinène, cyà mushinga mutàmbe bunène citùdi naaci kumpalà kwètù mpindyewu cidi n’*Dibàkà Nè Difwà Dyà Dibàkà*. Nèнку kwòkò kwikalè lukonko, kùdi ne cyà kwikala dyandamuna. Kakwèna mwà kwikala lukonko to ànu kwòkò dyandamuna. Nànsha ciikalè cinyì, bìdi bikèngela kwikalè dyandamuna. Bu Mukalenge mwà kwanyisha, ndi muswè kuteeta kwakula pa cyòci aci, mu dyàlumingu mu dinda.

<sup>8</sup> Ne pashìshe, mààlabà dilòòlò, ngeela meeji ne bìdi bikèngela bwà twètù kwikala ku. . . Cilongelu aci bàtu bàcibiikila bìshi? [Mwanèètù Neville ùdi wàmba ne: “Parkview.”—Muf.] Dibàlaasà dyà Parkview. Ncinyì, mukalenge? [“Cilongelu Cibàndile cyà Parkview.”] Cilongelu Cibàndile cyà Parkview. Mbanganyì bàdi bamanyè mwaba wùdìci? Èè, ngeela meeji ne nebiikalè ne bimanyinu’s, kî mmwòmò anyì, Mwanèètù Neville? [“Èyowà.”] Nwikalè. . . Cidi ànu lwà kumutù eku mu ntàntà wa bu—bu kilòmèetà umwe ne ndambù, ne nekwikalè cimanyinu. Udi ukùdimuka, wela nyimà ku njila. Nnzùbu mulenga, mujuula. Ùdi ne myaba yà wèwè mwà kutèekela dibòko, ne kufùnda byùdi muswè kufùnda abi, ne—ne—ne bikwàbò. Ne ndi mutwishiiibwe ne necinùsànkishè

ndambù kutàmba ne munùdi bafwànyine kwikala, benzè bu bafinàkàne mu masangisha apa mu—mu tabernacle emu. Nemwikalè myaba yàbùngì menemene, mwaba mwalàbàle wà kwimanyikila màshinyi.

<sup>9</sup> Mpindyewu, ngeela meeji ne bàdi ne kaamukenji kakesè katùvwà balayè bwà kuneemeka, kàvwa kàà ne, kubènga kufika mu bulà amu kumpàlà kwà dîbà isambòmbò ne citùpà. [Mwanèètù Neville ùdi wàmba ne: “Kì ntoo ne dîbà itaanu ne citùpà to; kî nkwikalakù kumpàlà kwà dîbà itaanu ne citùpà to.”—Muf.] Kàdi ndîbà kaayi. . . [“Bàdi bünzulula biibi pa dîbà isambòmbò ne citùpà.”] Ngeela meeji ne ncifwànyine kwikala mmwènenu mwîmpè bu twètù mwà kukùfika pa dîbà isambòmbò ne citùpà.

Mpindyewu, bàdi ne dikwàbò dibàlaasà mu cimenga emu didi ne myaba yà bantu bàsòmba binunu bìsambòmbò. Bu twètù mwà kuditwala bìmpè menemene mu edi, mbafwànyine kutùpetesha dikwàbò adi musangu kumpàla eku bwà disangisha dyà dinène, pàmwàpa misangu mikwàbò mu muvù wà luuyà ewu pàngààfùmà dyàmwàmwà dyà mbù.

<sup>10</sup> Ne pa nàнку ngeela meeji ne netùpetèku mwà kusòmbesha bantu. . . Mbantu bùngì kaayi batùdiku mwà kusòmbeshamù? [Mwanèètù Neville ùdi wàmba ne: “Tudi mwà kubàsòmbesha batwè ku binunu binaayi.”—Muf.] Binunu binaayi. Pa nàнку, nudi numòna’s, netwikalè ne myaba bùngì cyanààna. Kakwàkwikala byà kwenda kudiipata to. Nènku nùlwayi pa dîbà isambòmbò ne citùpà. Nènku dîbà adi bantu bònso bàdi mwà kubwela pa dîbà dikumbàne, bònso pàmwè, ne ndi ngeela meeji ne nenùpetè—nenùpetè mwaba mwîmpè. Kàbidi mmujuula mùshindù ewu, ne—ne kaaba apa kaùdi mwà kufùndilapù tuubintu, ne bikwàbò. Nènku necibangè, bu Mukalenge mwà kwanyisha. . .

<sup>11</sup> Ngeela meeji mpindyewu, dilòòlò edi ne, bu mùdi eci ndisangisha dyà milòmbò dyà diisàtù dilòòlò, tudi ne. . . Mwaba ngwewù wàmba kuula, pa nàнку ndi ngeela meeji ne pàmwàpa mbîmpè bu twètù mwà kubanga mààlabà dilòòlò. Tudi bafucile mwaba awu ànu mu ditèkemena dyà ne pàmwàpa, bu twètù mwà kwikala bùngì bukumbàne bwà bafwànyine kuula ne pambèlu, tudi bafwànyine kuya kwòkò aku. Kàdi ndi ngeela meeji ne bìdi. . . mbifwànyine kwikala bitàmbe wîmpè kuyakù, kwènàkù pèèbè wela meeji nàнку anyi, Mwanèètù Neville, bwà kumbà ànu kukùya mààlabà dilòòlò? Kàdi mbanganyi bàdiku bèèla meeji ne aci ncifwànyine kwikala mmwènenu mwîmpè? Ne dîbà adi nudi mwà kupeta myaba bù—bùngì cyanààna. Mwaba wùkaadi—wùkaadi mumana kufucila; mmufidila mfrangà kùdi bânà bèètu kampàndà bàà mu èkéleziyà emu. Mbitùyiilè ànu ndola makùmi àtaanu ku dilòòlò dimwè, cidi musinga mukesè be, be. . . Mv’wà kujinga bwà bìikalakù nàнку myaba yònsò, bafwànyinekù kupeta myaba yà bantu bàsòmba bùngì

abu ku ndola makùmi àtaanu bwà dilòlò òm̀wèpelè, nzùbu mupyamùpyà menemene, cibùmbà cilenga. Nenku, kàdi tudì . . .

<sup>12</sup> Mu bushùwà bwà bwalu, netwàngatè milàmbù, m̀ndì ncinka. Nènku katwèna baswè bwà bantu abu kufutabò cyòci aci anu b̀b̀ò nkààyaabò to; netùfutè bwà . . . netùbàlùjilè ỳỳi. Kàdi patùdi tukùmbaja mfrangà yètù yà ditùùla ne bikwàbò, èè, d̀b̀a adi, mu bushùwà bwà bwalu, tudì twimanyika dyangata dyà milàmbù. Katwèna . . .

<sup>13</sup> Kwòkò kwikàle beenyi munkaci mwètù, tudì bavwijè aci cilwè ngenzèlù, bwà kubènga kulòmbangana mfrangà, kwikala ne kanza koolola, kusàkasaka bantu ku difilà dyà mfranga. Tudì twendesha dilòngò dyà disangishila milàmbù, cidì ànu . . . Aci ncyenzi cyà mu maalu a ntèdeleelu. Mèmè nkàadi muciteetètètè, misangu ne misangu, kubènga nànsha dyendesha dyà dilòngò dyà disangishila milàmbù, nànsha dyà kakesè, kàdi kabiyi bikùmbanakù to. Nwamònu anyi? Bwalu, kufila ncutùpà cyà ntèdeleelu wetù. Ncutùpà cyà dibànzà ditwèla. Nànsha ciikàle ànu kaacicyelè kàà meyà dikùmi, anyi nànsha ciikàle cinyi, anyi dyeyà, byònsò abi bidi . . .

<sup>14</sup> Pa nàнку nudi bavùlùke ne, Yesù wàkamòna mukàjì mukàmba kampànda ùpicila mwaba awu, d̀ngà ditùkù, mwaba wùvwà bantu babanji bèela mabanji àbò bùngì cyanàana mu cibucilu amu. Ki mukàjì mukàmba ewu kupicilayè pèndè mwaba awu, pàmwàpa ùvwa ne ndambù wa b̀anà bakesè, ne nzala biikàle bàya ku luseke lwèndè, kàdi kufilayè cyònsò civwàye pèndè naaci aci, tuumeeyà túsàtù. Ki Yesù kwambaYè ne: “Udi mufile kutàmba b̀onsò nganyi?”

<sup>15</sup> Mpindyewu, bu ne mèmè nguvwa mwimàne mwaba awu, ǹnku's ndi mwambè ne: “Kwènji nàнку to, mwanètù wa bakàjì. Tudì—tudì, t̀ngilà, tudì ne mfrangà bùngì cyanàana.” Kàdi Yèyè kàakamwimanyikakù to. Nwamònu anyi? Ùvwa—Ùvwa mumanyè ne Ùvwa ne cintu kampànda citàmbe bunène kumpalà kuvwàye ùya aku. Pa nàнку, nwamònu's, twamb'eku twamb'eku, ùvwa ne nzùbu mu Butùmbi, mùvwàye ùya amu. Nènku Yèyè kàakamwimanyikakù to. Wàkamulekela wèla tuumeeyà twèndè túsàtù atu, bwalu ki civwàye ànu muswè kwenza. Ne ùvwa ne cyà kwikala muswè kucyènza; bwalu ùvwa ne b̀anà, mwikàle mukàjì mukàmba, kàdi mwikàle ànu ne tuumeeyà túsàtù cyanàana bwà kudyàye. Awu mukàjì, ùvwa ne cyà kwikala muswè kwenza nàнку. Pa nàнку, nudi numòna's, pàdi bantu baswè kufila, bìdi bikèngela kubàpèèsha mpùngà wa kwenzabò nàнку.

<sup>16</sup> Kàdi ndi ngeela meeji bwà bàdi biimàne aba, ne bantu bàmba ne: “Wàfila ndola makùmi àtaanu nganyi? Wàfila ndola makùmi àbidi nganyi?” Ngeela meeji ne aci ndipanga dyà—dyà meeji. Ndi—ndi ngeela meeji ne bantu bàdi bàjingulula ne bìdi bikèngela mfrangà bwà—bwà kwenza ma—masangisha.

Ne kacya ncìvwakù mufwànyine kubàlekela bacyènta to, balongololodi bàà ndongamu abu. Mvwa ngamba ne: “Dìbà dyònsò dìikalàbi ne bikaadi bikèngela bwà nwènú kwenza aci, apu kaayi dìbà dyàkànyì dyà mèmè kwalukila ku tabernacle. Pa nàнку, kabyàkukèngela bwà twètù kwenza aci to.” Kàdi ncyà bushùwà ne ndi—ndi mèmè ngeela meeji ne bikèngela twèndeshè dilòngò dyà disangishila milàmbù, bwà—bwà kwenza ne mudimu wètù wà ntèndeleele wikalè mukùmbànàngàne.

<sup>17</sup> Nàнку pàmwàpa nebèndeshè dilòngò dikesè dyà disangishila milàmbù dilòlò dyònsò, bàmba cintu kampànda cyà bu ne: “Èè, tukàadi tusangisha mulàmbù mpindyewu.” Nènku nebèndeshè dilòngò dyà disangishila milàmbù adi, ne ki—ki ciikalà ndekeelu wa bwalu abu.

<sup>18</sup> Nènku dilòlò dyònsò, bu Mukalenge mwà kwanyisha, Ndi ngeela meeji ne Mukalenge mmutèèke pa mwoyi wànyì Dyiisha dishindàme bwà Èkèleeziyà. Ndi mwenzè matùkù àbùngì mu disambila. Kàdi ncyàkubwelamù to, bwalu cintu cinènè cyà cìkèmesha ncyenzèke ditùkù adi cìvwà bushùwà cinènè menemene. Ne ndi nzùka bwà kunùlonelaci. Nènku mpindyewu, cyena-bwalu cyà mushinga, ngeela meeji, cìvwà pàmwè ne bòbò bònsò bàbiikidila, mùdi Billy mwambè, cìvwà mpa *Dibàkà Nè Difwà Dyà Dibàkà*. Cyà bwalu, ncyena-bwalu cinènè—cinènè, ne mèmè—mèmè ncìvwà mumanyè mwà kucilenga to. Ki mèmè kuya bwà kasambila pa bwalu abu, ne Mukalenge kutwilangana Yè naanyi. Ne ndi mumanyè ne mèmè, ku. . . ncyèna naaci to, kàdi Nzambi ngudi mumpèèshe; nkàadi naaci mpindyewu. Nzambi mmumpèèshe dyandamuna dijaalame, nwamònu’s, nwamònu’s, ne ndi—ndi mumanyè ne ndilelèlà.

<sup>19</sup> Ne pa nàнку ncyèna ànu mwanjì kumanya menemene to, pàmwàpa, mu dyàlumingu ndi mufwànyinekù kulòmba bàna bèètù bàà bakàjì anu bwà kupùmbishabò mu disangisha adi, bòbò biinè, kàdi ncyèna—ncyèna mumanyè to. Mbilondèshile ku ne bakàjì basèla ní mbaswè bwà kulwa ne baabàyaabò. Kùdi—kùdi bìmwè bintu byà mushinga mukolè byàkèngelà kwambiibwa, kwamba bulelèlà bwàbì, ne mùdi. . . Nènku kakùyì mpatà to tudi baswè kucyàdija, cyà EMU MMÙDÌ MUKALENGE WÀMBA, pashiishe nudi nucieta dìbà adi. Nudi numanya ànu cìdì Bulelèlà dìbà adi’s. Kàdi mèmè ndi mMweyemena Yèyè bwà kwenza cyòci aci.

<sup>20</sup> Nènku, mpindyewu, mvwa nsanganyiibwa ku nzùbu wa cidìilu eku ditùkù adi, munkaci mwà kudyà, ne—ne Jerry ne bwònsò bwàbò bànúkèba nwènú bònsò. Bàvwà bàmba, bàmba ne: “Èè, tudi. . .” Bàmwè, umwe wa ku bansongàalùmè uvwa mwab’awu, kwambayè, muntu awu kwambayè ne: “Nènsàkulè bìmpè be lumingu elu,” yèyè ne, “bàdi ne. . . Anyì, mbingu yibìdi yidì yilondà eyì.” Yèyè ne: “Bàdi ne—ne cisangilu mwaba ewu, cyà ndundu wa mu tubòndo, anyì cintu kampànda.” Kwambayè,

pashiishe kwambayè ne: “Branham ùdi kuntu kwàka, neenzè disangisha.” Yèyè ne: “Nèndiishè bantu búngi cyanààna.” Ku Ranch House, wùmwè wà ku myaba ayi kuntwaku. Nènkù bàvwa . . . bàvwa bàà maalu malenga a dikèma.

<sup>21</sup> Nènkù ndi nnwànyisha nwènù bônso, bwalu bàvwa cyà bushùwà banùtwe makùmbù ne bambè maalu malenga bwà bwalu bwènù.

<sup>22</sup> Mulongolodi wa ndongamu ku Ranch House aku ùvwa mutwilàngàne naanyì dindà adi. Mvwa mulwè lwà pa díbà ìbìdì ne citùpà, mfùmina ku Arizona. Ki yèyè ne: “Èè, Mwanèètù Branham,” yèyè ne, “ndi ngumvwa bàmba ne newikalè mwà kwenza masangisha makwàbò.” Yèyè ne: “Ndi musàkidìle beena mudimu bakwàbò,” mwakambàye. Ki yèyè ne: “Pashiishe ndi muswè kwamba cintu cimwèpelè, ncyà ne bantu bàdì bàfùminà kuntwaku,” yèyè ne: “s’mbantu bàà maalu malenga bàà dikèma.” Mpindyewu, aci kwenzaci ne ndyùmvwèku bimpè menemene bwènù nwènù, nwamònu’s.

Bwalu, twamb’eku twamb’eku twamb’eku, mu mùshindù kampànda ndi ndyùmvwa ànu bu ne nudi twànà twànyì, ne ndi—ndi, anyì, bàna’s wè, èyo. Nènkù ki mèmè. . . *Kànà* mpatùdì tutùma meeji ku mbùji, kàdì wèwè kwèna mbùji to. Nudi bàna bàànyì bàà mìkòòkò. Aci cidi cyùmvwika bìshi? Nudi bàna bàà mìkòòkò bàà Mukalenge bàdìYè mumpè bwà kudiisha. Nènkù ndi mutwìshìibwe ne neciikalè—neciikalè. . . ne Yèyè neenzè bwà nnùdiishe. Tudi twenda tupweka ne njila.

<sup>23</sup> Nènkù pa bìdì bitàngilà *Dibàkà Nè Difwà Dyà Dibàkà* edi, mvwa mujingè kwakulapù ànu kacya ku cikondo cyà Bitampì Mwandamutekète abi aku. Nudi bamanyè’s, maalu masokok- . . . Maalu masokoka ónsò àvwa ne cyà kumanyishiibwa munda mwàbì, mu dikàngula dyà Bitampì Mwandamutekète abi, maalu masokoka ónsò a Bible. Nènkù ndi ngeela meeji mpindyewu, bu mùnkaadi ngenda nkùlakaja, ndi—ndi ngeela meeji ne ndi. . . Mèmè kudyàmbidila ne bivwa bimpèku bwà mèmè kucitèèka nànsha pa mukàbà wà mèyì, bwà ne bu cintu kampànda mwà kungenzekela, díbà adi Èkèleeziyà mmufwànyine kudikonka ne: “Ndi ndikonka ciwàye naaci mu meeji’s. Ciwàye muswè kwamba ncinyì?” Ne byena-bwalu byónso bìdì bimwèka bu bikolè menemene abi; ndi ngeela meeji ne, ku . . . ku dikwàcisha dyà Mukalenge, nènteetè bwà kunùtwàdilabì. Nènkù díbà adi—díbà adi bu cintu kampànda mwà kwenzeka, bu byòbì mwà kwenzeka ne nye kumpàlà kwà kulwaYè, díbà adi ne—nenwikalè naaci cikwàta pa mukàbà wà mèyì.

<sup>24</sup> Ngeela meeji ne tudi ne ndambu wa mikànda mipyamìpyà mipàtùke. Ndi mmòna Mwanèètù wa bakàjì Vayle; ncyèna mumanyè docteur ní udi kaaba aka anyì kènàpu. Udi mwaba ewu anyì, Mwanèètù wa bakàjì Vayle? Pàmwàpa ùdi mu disangisha emu. Ncyèna mumumòne to. Kàdì, kaa, èyowà, mu

ndekeelu menemene mwàmwà. Ne Mwanèètù wa balùme Vayle mmufùnde mukàndà, ne wùdi. . . Mvwa ndyàmbedila, ngeela meeji ne mbambè leelù ewu, yìbìdi. Mwanèetu wa balùme Vayle, mmwòmò anyì, udi naayi yìbìdi mwaba ewu mpindyewu anyì? Mikàndà yìbìdi. Mpindyewu, ncyèna mumanyè to, ndi. . . Mùshindù wùndì ngumvwa bàmba, ne muntu yònsò ùdi ùpeta mukàndà. Pa nàнку ndi. . . Nwènù. . . Ki mùshindù wùndì mèmè ngumvwa. Ndi mwà kwikala mutùpàkàne mu cyòci aci.

<sup>25</sup> Ne pashiishe wà *Bikondo Mwandamutekètè Byà Èkèleeziyà* awu wàjiki (Mmwòmò anyì, Mwanèètù Vayle?) ne munkaci mwà kutuuciibwa ku cyamù mpindyewu. Nènku ndi mumanyè ne nenùswe kuyipeta, bwalu yidi yàndamuna ku nkonko bùngì cyanààna yìtu munda mwà myoyi yènù. Ne pashiishe paanyimà pàa aci, èè, netùteetè bwà kukàngula *Bitampi Mwandamutekètè*, nudi bamanyè's, mu mùshindù wà mukàndà, bwà muntu yònsò wàmòna mwà kubala mu mùshindù wùdìbo—wùdiye muswè kubala, wàmòna mwà kucyùm vwa ne kucìlonga. Mèmè ndi ngeela meeji ne pàdici cifùndiibwe, pìikalàci. . .

<sup>26</sup> Dyàmbedi, tudi bacyàngàte buludì pa mukàbà wà mèyi, mùshindù wùvwàci cifùnda ne cyakùdìibwe. Nudi bamanyè's, wèwè udi mwà kuyiisha diyiisha kampànda, ncintu pa bule, ne pashiishe kufùnda mukàndà ncintu pa bule. Nwamònu's, mùdìbi bifwànyine kwenzeka ne ndengè cyena—bwalu kampànda, mùndi mufwànyine kukwambila, wèwè mufwànyine kuumvwa, ndi mufwànyine kwamba ne: “Mpindyewu, dimiinu dyà nyòka,” nwamònu's.

Èè, mpindyewu, mubadi wa mwinè mukàndà awu, bu wèwè mwà kuumusha aci, s'mmufwànyine kudìkonka ne: “Dimiinu dyà nyòka ki cinyi's?” Nwamònu anyì? Nènku kí mmufwànyine kumanya to. Bu byòbi mwà kwenzeka ne bikabwelè mu mwaba kampànda bu mùdi Princeton anyì mwaba kampànda, ne bòbò—mbafwànyine kudyàmbedila ne tudi bantu bimbùlùntùntù.

Pa nàнку ndi mulòmbe Mwanèètù Vayle bwà àngambùlwishèku ne cyòci eci ne kulama njila wa meeji àmwèàmwè awu, ne kufìlakù mwakulu. Ne mèmè ndi mutwishiibwe ne wànyì mwakulu mmufwanyine. . . Ncifwànyine kwikala bwalu—busokoka kùdìbo bòbò, cyà bushùwà menemene. Pa nàнку. . . Mwanèètù Vayle mmumanyè aci bikolè, pa nàнку ùdi ànu mùdi. . .

<sup>27</sup> Ne pashiishe, mu cyòci aci, ndi ngeela meeji ne mwanèètù wa mushinga mukolè awu ùdi ne cyà kwikala mwangùle ndambù wa busonsodi bwà pamutù, mùshindù kampànda, ne yèyè ùvwa mwambè ne ùvwa mwà kufùnda mikàndà yìbìdi yèndè sungasunga, myangacila pa byòbi abi, bu nàнку. Pa nàнку mmufùnde wùmwè mwinyika, ngeela meeji ne, *Mupròfetà Wa Cicyà Cyà Makùmi Àbìdì*, ne mukwàbò ne, *Èkèleeziyà Wa Laòdìkiyà*, ngeela meeji, anyì cintu cyà mùshindù awu.

28 Ne Billy mmungambile, dilòòlò edi, ngeela meeji ne binunu ne binunu byà wówò awu mbifikè leelù ewu; muntu kampànda ngudi mulwè naayi muumùkile ku Texas. Nàнку awu, neyìikalè mwaba ewu. Ne nebàyìfidilè dimanyisha, ngeela meeji, cyònsò cidiyi aci. Ngeela meeji ne mbayitùùdile mfrangà. Ncyèna mutwìshìibwe to. Nènku piikalàbi nàнку, nebànwàbànyineyi kàbìdì, nudi numòna's, cyanàànà. Ne tudi tutèkemena ne newùnùsànkishè. Nènku wówò wùnùsànkisha, nùlabulààyikù Mwanèètù Vayle wàwa ku cianza nùmwambile munùdì numwanyisha. Mémè ncitukù mwanjì kuwùbala to, mémè mwinè. Bu mémè mwà kuyibala, ndi mufwànyine kushintulula mmwènenenu wanyì pa cyòci aci, pa nàнку nènditacishè bwà kuyibala lumingu elu pàndì mpeta mpungà, bu mémè mwà kupeta mùshindù.

29 Mpindyewu bu mùdìbi ne tudi mu diisàtù dilòòlò, mùdìbi bimanya kùdì bònsò ne masangisha ètù àdì àbanga mààlabà dilòòlò. Kàdi ndi ngeela meeji ne, mu kwikala kwànyì mwaba ewu munkaci mwènù, Ncyè—ncyè—ncyèna ànu mwà kushààla kwànyì kumbèlù kwàka ne—ne kumanya ne nuwva bònsò kaaba aka to. Ndi... Ànu mùdì, nudi bamanyè's, mùdì bimwè byà ku bilòngò byènu bìdì bìlwa, nudi bamanyè's, nuya lubilu ku ndekeelu kwà kajila bwà kutwilangana naabò, nudi bamanyè's. Nènku—nènku mwà—mwà ndyàm̀bidila ne mwà mufwànyine ànu kulwa lubilu bwà—bwà kunwàkidila mu Jeffersonville. Ne pa nàнку lumingu lwàshàadi elu nkààvwa ànu ne. . .

To, mfwilaayikù luse, kùkaadi mbingu mitwè ku yisàtù, mémè mwalùkile kumbèlu. Mwà mupàtùke nteeta bwà... Mwà mu masangisha kampànda a mu Arizona mwònsò mwàmwa, kàdi mémè kwalukila bwà kuteeta kwikishakù. Ki mémè kuya mu lwendu lwà dilemba dyà nyama, ki mémè—mémè kupeta nyama wa ntambwe wa mutàmbe bunène mu province wa Arizona. Ndi mulumbàtàngàne nendè ntàntà wa kilòmèètà makùmi àsàtù ne yìbìdì yà diitu dyà micì mikùna bwà kumupeta.

30 Kàdi pashìishe pa kwela meeji, nànsha nàнку ne, ncìvwakù mwelè meeji pàncìvwà mwànà mutekète... Ànu bwà kuleeja mùdì bintu ebi byènzeka, nzùbu mukesè udi Mukalenge mutùpèèshe kuntwaku, bwà ngondo yitùdì tusanganyiibwakù, ne bwà kàlaasà kàà bânà.

Mwà mwànà mutekète. Ngeela meeji ne Jimmy Poole udi kaaba aka dilòòlò edi, pàmwàpa tatwèndè ùdipù, Jim mukolè. Tutu bayè nendè mu kàlaasà pàmwè, ne ndi mvùluka ne mémè musòmbe mwaba awu, bu mwànà wa kalè muvwàle mbondya, ne bisàbaatà, bisàbaatà byà kecyè, bânà bàà nkàsà bapàtùkemù; nsomba dibèjì kùdì muntu, ne crayon kùdì mukwàbò.

31 Mwà ne ciibidilu cyà kufùnda tusàlà. Nènku M̀andàmù Wood, ewu, mmundòmbe bwà kutwàmbulula ku mwoyi mu



mappingaja emu pa mukàbà wà méyì, pa bidì bitàngilà kàshinyi kàányi kàà kale kàà Ford aku, nudi bamanyè's, ne kòkò—kòkò nkimpè be. Mpindyewu, yèyè ne: “Èè, s’bivwa bikèngela wèwè kukàtùma kùdi Mukalenge Ford.”

Mémè ne: “Kùdi bulelèlè bwàbûngi be, mûndi ngeela meeji,” bwà kantu kàdi kàzèla lwà kumpàla aku, ne mutoooyi bu wà dipela wùdi paanyimà awu, ne yèndà mwenzè bu cintu cikolè bwà kuumvwa cyà ba-Chinois. Kàdi ndi . . . Cidi—cidi . . . Kàdi mvwa misangu yònsò ànu ngamba, cintu cimwèpelè civwa cikèngelà bwà mémè kwenza ncyà kubala ndundu yìnaayi yà kàshinyi ayi, ne kukànyukulula bikolè bwà kukàfikisha ku diteema kàdi pashìishe kubwelamù. Mémè kwamba ne: “Kàvwa kimpè pàmvwà mbànda naakù kakùnà, kènda kàdikòka ànu bitekète bitekète menemene, kàmba ne: ‘Ngeela meeji ne ndi mwà kubànda, ngeela meeji ne ndi mwà kubànda, ngeela meeji ne ndi mwà kubànda.’ Pashìishe kubanga, luseke lukwàbò alu, kàmba ne: ‘Mvwa mwelè meeji ne mvwà mwa kubànda’s, mvwa mwelè meeji ne mvwà mwà kubànda’s.’”

Mùshindù awu ngutùdi tudikòka pa kakùnà aka, bu *Diya Dyà Kumpàla Dyà Mwena Lwendu*. Pa nàнку tudi . . .

<sup>32</sup> Mvwa ne kasàlà kakesè kàmvwà mufùnde, cintu bu nùнку ewu. Ki mémè ne . . . Mpindyewu, anjì elààyìbì meeji, ncìcìvwa ànu ne bidimu bitwè ku dikùmi ne bìbìdi cyanaànà. Nèнку mémè mwimàne mwaba awu, ditùkù adi, ntàngila kuulu kwà lupòngò alu, ne ndyàmbidila ne: “Nyama wa ntambwe awu neàteekiibwè apa mene mu cibambalu cyà ciikishilu eci, mutàngile lwà pambèlu pa dididiishi,” mu dididiishi dyà lumwènu. Mvwa ngeela meeji ku kasàlà kakesè kampànda. Mémè kwalukila e kukàmbula, cintu bu nùнку ewu. Anjì elààyìbì ànu meeji mùdi Nzambi . . .

<sup>33</sup> Nudi nwitabuuja ne Nzambi ùtu mu disonsodiibwa dyònsò anyi? Bikèngela bwà Nzambi àfundè Yèyè musambu. Nudi nwitabuuja ne Nzambi ùtu mu misambu anyi? Yesù wàkamba nàнку. Wàkatèèla Davidi ne: “Kanwènaayikù bamanyè cyàkambà Davidi mu Misambu anyi? Nudi bamanyè’s, kacyènakù . . .”

<sup>34</sup> Tàngilàayi dipoopediibwa mene dyà pa nkùrusè. Davidi wàkacyàmba mu musambu, mu Musambu wa 22 ne: “Nzambi Wanyì, Nzambi Wanyì, WàNdekèdi bwà cinyi? Mifùbà Yànyì yònsò, yìkaadi miNtàngile. Bàdi bàtùbula byanza Byànyì ne makàsà Àànyì.” Nudi bamanyè’s, ne aci’s civwa mmusambu. Misambu yitu—yitu mmusambu.

<sup>35</sup> Nèнку mu mfùndilu wa tusàlà ewu, tàngilàayi ànu nùmonè mwàkenzekàci. Musòmbe mwab’awu, mwànà mukesè wa cikùlukulù mwikàle ne dibèjì dyà mukànda disomba, ngamba ne:

Ndi ndimòna nkààyaanyi, kaa, nkààyaanyi  
 menemene mwoyi wùjinga sud wa wesètè  
 kule menemene kwàka,  
 Kùdi mindidimbì yitamba kupòna mu ndòndò  
 kuulu kwà lusongo lwà mukùnà.  
 Ndi mwà kumòna mubwàbwà wùbembela  
 pabwìpì ne dibungi dikùnzùbile,  
 Ndi mwà kuumvwa mbwa wa diitu wèla  
 mikunda kwinshì kùdi ngombe yà nsèngù  
 mileemìle yidìila bisoosà aku.  
 Ne mwaba kampànda kuulu kwà lupòngò  
 kampànda ndi mwà kuumvwa nyama wa  
 ntambwe ùdidila mu mènù,  
 Mu Mikùnà yà Catalina mule mwàmwa, ku  
 mukàlù wà Arizona.

<sup>36</sup> Bidimu makùmi ànaayi bimanè kupìta, mmémè ewu  
 musòmbe ànu mwaba awu mene ku lwòlò lupòngò alu, nyama  
 wa ntambwe awu muntàngìle mumpàla.

Éyì Nzambì wa yààya, kùdi Buloba dyàmwàmwà dyà  
 musùlu mwaba kampànda's, balundà bàanyi. Cidi ànu...  
 Bùdi ne cyà kwikalakù. Nwamònu anyi? Kùdi—kùdi byàbùngì  
 be bìdì byàkula bwalu abu. Bintu byònsò ebi kabyèna ànu  
 maalu mafwikakaja nànsha; bìdì... Mbilelèlè. Mbintu byà cyà  
 bushùwà. Mémè ndi ne disànkà dyàbùngì bwà kwikala kaaba  
 aka dilòlò edi, kwikalakù pàmwè ne bantu bándì ntèkemena  
 ne nengìikalè naabò Kwòkò aku bwà kashidi, kwikalà kakùciyi  
 kabidì mabèèdi, anyi lufù, anyi byà dishiyangana. Ne lwendu  
 kalwàkwikala cintu cicolè to bwètù twètù dibà adi.

<sup>37</sup> Mpindyewu, ndi ngeela meeji ne disangisha nànsha dimwè  
 kadyènakù dikùmbànàngàne to pàdiku kakùyi dibala dyà Dìyì  
 ne kwikalakù ne ndambù wa... .

Mwanèètù Neville, ndi mfùma ku dibànda kaaba aka.  
 Billy ngwängambidì ne uvwa ukèba bwà mémè kwakula.  
 Ncyà bushùwà anyi, Mwanèètù Neville? [Mwanèètù Neville ùdi  
 wàmba ne: “Amen. Éyowà. Bushùwà's.”—Muf.] Ndi, pàmwàpa,  
 mutàmbe kwangata ndambù maalu ànu mùdiwu amu, kàdi ndi—  
 ndi ànu mudyùmvwè bîmpè be bwà bwalu abu.

Pa nànkù, mpindyewu, nwènù bàdì ne misambu ne bikwàbò  
 abu, nùmonganàayi ne Mwanèètù Neville panwikalà mwà  
 kwimba apu, ne pashìishe ikàlaayi ànu naayi, kwàka nàka.  
 Nènku nwàngatàayi ànu bu tusunsa tutwè ku makùmi àsàtù  
 cyanàànà bwà byà mbangilu wa disangisha, nènku tùbwelàayi  
 buludì mu Mayiisha a ndòndò wa menemene aa bwà tùmone  
 citùdì mwà kumòna Mukalenge wènza aci. Ne ndi ànu  
 mutwìshìbwe... .

<sup>38</sup> Ndi—ndi ngiitabuujà ne tudi ne Bulelèlè. Ndi  
 musànkishìbwe ne cyòci aci. Ndi ngeela meeji ne blé ùkaadi,

kakùyi mpatà to, cizubu cikaadi munkaci mwà kudikòka ne kuumukapù. Nudi bamanyè. Nènkù, nwamònu's, ndi mwà kufilakù ntwàdijilu mukese pa cyôci aci, mààlabà dilòòlò, nwamònu's, mùdi cizubu munkaci mwà kudikòka ne kuumuka ku blé. Kàdi bìdi bikèngela bwà blé àshaalè mu Bwikadi bwà Mwànà, bwà kubobayè. Nènkù ki citùdi bavwilè mwaba ewu, mulundà wanyì, kushààla mu Bwikadi bwà Mwànà too ne pìikalà kasùmbù kèètù kakesè kàà bantu aka, too ne pààlwàku kabobè menemene bwà Kilistò, mu mùshindù wà kàlwa dyàmpà pa mèèsà Èndè. Ki cìndi muswè bwà kwenzaci.

<sup>39</sup> Nènkù mpindyewu kumpalà kwà twètù kulenga Dìyi, paanyimà pàà mumanè kwambulula tusalà atu ku mwoyi, ne bikwàbò, túsambilàayi cyàkàbìdì. Pashiishe netwàngatè cyena-bwalu.

<sup>40</sup> Yesù munanga, tükwàcishèku dilòòlò edi mpindyewu, mu tuumèyi tukesè etu, patùdi tuKwindila apa. Ne tudi tulòmba bwà ngàsà ne luse Lwèbè bìikalèku neetù, Mukalenge. Ne pòleshàku myoyi yètù; sàkakù bizubu, mèbà, mingònga yònsò paanyimà, muunya mubènèshìibwè wà Nzambì wumacilèku pa Dìyi, Mukalenge. Ne swàku bwà twènzè disangisha dinènè mu mùshindù wà ne kakwikadikù muntu nànsha umwè kàyi musungìdìibwe munkaci mwètù to, bânà bònsò bìikalè mu Bukalenge bwà Nzambì. Aba bàdi kabàyi ne dibàtiiza dyà Nyumà abu, swàku bwà bàMwakidilè, Taatù. Swàku bwà maalù masokoka manène ónsò atùdi ne cyà kumanya mu cikondo eci awu, Mukalenge, àbuuludiibwè kutùdi; nènkù netumònè dimwèka patòòke dyà Nzambì, bwà twamòna mwà kumanya mùshindù wà kudìtwàla ne kwenza maalù mu mùshindù mwìmpè, bìikàle tudìlongolola twètù biinè ne tubweja bidimba byà mubidi wètù mu dishidimunyiibwa ku Dìyi, bwà twamòna mwà kumanya mwà kwikala ne mwoyi mu ditùkù dyà mpindyewu edi ku diseemena dyà Mukalenge Yesù.

<sup>41</sup> Pàndì mbala Dìyi Dyèbè dilòòlò edi apa, Mukalenge, ndi mufwànyine, ku tulaasa tulonga katùyi tujikija, kumanya mwà kubala yìmwè myakù, kàdi pàmwàpa kushindumuna mikwàbò bibi. Kàdi, Mukalenge Nzambì, Wèwè nkààyeebè ngudi mwà kupàtulamù cyena-bwalu. Wèwè ki Umwèpelè udi mwa kucyènza. Kakwènakù mùshindù nànsha wumwè—nànsha wumwè wà muntu wetù ewu bwà kucyènzayè to; cidi cisanganyiiibwa mu byanza Byèbè Wèwè, Mukalenge. Pa nànkù utùpèku, dilòòlò dyònsò, bintu bìdi bisokoka mu Dìyi Dyèbè abi, bwà twamònakù mwà kwikala beena Kilistò batàmbe bwìmpè ne kwikala ne mwoyi bilondèshìle cikondo citùdi ne mwoyi, bu bileejilu byà bwena Kilistò. Tudi tulòmba mu Dìna dyà Mukalenge Yesù. Amen.

<sup>42</sup> Mpindyewu, bààbùngì bàà kunùdì, mu Bibles yènù amu, ndi muswè bwà nùbuululèku mu Mukàndà wà Yona. Cidi... Tutu misangu yònsò tutàmba ànu kwakula bwà Yona bu

muntu mutwè cìmpingà ne bikwàbò byònsò. Mémè ntu misangu yònsò ànu ngaakwila Yona. Ncyèna ngiitabuuja ne Yona ùvwa mutwè cìmpingà to. Mémè—mémè ncyèna ngiitabuujakù nàнку nànsha. Ngeela meeji ne cìdi ànu . . . Tutu ànu misangu mikwàbò tucyàngata, twamba ne: “Yèyè’s n’Yona’s.” Kàdi twètù. . . Nkààdikù mwakùle pa bwalu abu, mu mùshindù mukwàbò, mu kwamba mùmvwà mémè ngeela meeji, Yona, cyàkenzekà aci.

*Mpindyewu dîyi dyà MUKALENGE dyàkalwa kùdi Yona mwànà wa Amitàayi, dyàmba ne:*

*Juukà, ne ndà ku Niinwà, cimenga cinène aci, wèlè mbilà ne dîyi dikolè ubèngangana naaci; bwalu lwonji lwàbò ndubànde lulwè too ne kumpàlà kwànyi.*

*Kàdi Yona wàkajuuka e kunyeema mutàngile ku Taashishi ùmuka mu bwikadi bwà MUKALENGE, ne wàkapweka ku Yopà; ne wàkasangana màzwà àya matàngile ku Taashishi: pa nàнку yèyè kufuta mushinga wà lwendu bwà kwòkò aku, bwà kuya naabò ku Taashishi ùmuka mu bwikadi bwà MUKALENGE.*

<sup>43</sup> Awu kî nndekeelu wa wènza dibungama anyi? *Muntu Ùnyeema Bwikadi Bwà Mukalenge*, nènku ki cyena-bwalu cyànyi ncyòci aci.

<sup>44</sup> Mpindyewu, dyàmbedi tudi baswè kwanji kwelangana meeji pa cyòci eci. Yona ùvwa. . . Kabingilà, kablingilà kanène, kàndi ngiitabuuji ne yèyè wàkenza bwalu bunène ebu mwaba ewu, mbwalu Yona ùvwa mwena Yudà. Ne wàkalòmbiibwa bwà kuya ku cimenga cyà bàà Bisàmbà byà bendè, bwà kwela mbilà bwà kubèngangana naaci; mwikalè ùdyàmbedila ne kabàvwa bafwànyine kumwakidilakù to. Bwalu, bàà Bisàmbà byà bendè abu bàvwa bafwànyine kwela meeji ne: “Ewu mwena Yudà masangu neetù mpa cinyi?” Kàdi, nudi numòna’s, cikwàbò cintu, cìdi citùpèesha cintu cinène mwaba ewu cyà kumòna ne, Nzambì kèna Nzambì ànu wa beena Yudà to, kàdi Ùdi kàbidì Nzambì wa bàà Bisàmbà byà bendè. Yèyè ùdi Nzambì wa bantu bònsò.

<sup>45</sup> Yèyè wàkasungula ànu beena Yudà nkààyaabò. Beena Yudà bàvwa bàbìikidiibwa ne ncisàmbà cisungula cyà Nzambì. Bàakasungudiibwa bwà kablingilà kasungùlùke. Ne kablingilà aku kàvwa kàà ne, bwà kubàpèesha mikenji, kàdi bòbò kabàvwa mwà kuyilama to. Nènku Yèyè ùvwa ànu ùleeja, ùleejila ku cisàmbà aci ne, mikenji kayìvwakù mwà kulamiibwa to, ne—ne—ne Yèyè ùvwa Nzambì wa bwakàne. Ne mikenji yìvwa yilòmba bwakàne, kàdi kakùvwa ngàsà nànsha mukèsè mu mikenji to, bwà kupàtulamù muntu. Kakùvwakù cibawu cìvwà cifuta kùdi mikenji to, kàdi bìvwa bikèngela ngàsà bwà kufùta cibawu aci, anyi kùvwà mikenji mitùtèèke mwinshì mwàyi aku.

<sup>46</sup> Ne Yona apa wàkabiikidiibwa, bu ne, ngumwe wa ku baprófetà bàà twànàtwànà bàà mu Bible, bwà kupwekayè kuya ku cimenga eci.

Ne apa tudi tusangana cileejilu cyà twètù bônso. Yônso wa kutùdi, tutu misangu yônso ànu tunyeema cintu kampànda, tunyeema lutàtu, tunyeema majitu a dyambula, tutu—tutu bônso ne meeji matùma ànu ku cyôci aci. Tutu—tutu—tutu ne meeji matùma ku dinyeema kutàmba ku dishàala biimàne bwà kukungamangana ne bwalu abu. Nwamònu's, tudi ànu, tudi—tudi—tudi tudisangana twètù biinè biikàle tunyeema.

Míngà misangu tutu tudisangana twètù biinè ne meeji matùma ku dinyeema mudimu. Katùtu baswè, katùtu baswè kwenza mudimu to. Bámwè bantu bàtu ànu beela meeji ne bàdi mwà kwikala bàdya kabàyi bènza mudimu to. Kàdi, ndi ngeela meeji ne, Solòmò nguvwa mwambè ne tudi mwà kupeta dyandamuna mwaba ewu, mu kutangila kankenene.

<sup>47</sup> Nudi bamanyè's, kankenene kakesè aku, bàdi bàndondela ne kankenene (kônso) kòkò kakàyi kènza mudimu bwà kulama byàkudyà to, kankenene aku kakàakudyà mu muvù wà mashika awu to. Pa nàнку, bikèngela bwà—bwà muntu ne muntu énzé mudimu.

<sup>48</sup> Tudi ne bintu byàbúngì bìdi bikèngelà twètù kwenza, bujitu bwà dyambula bwàbúngì bùdi bukèngelà bwà twètù kukungamangana naabù. Muntu ne muntu ùdi ne cyà kukungamangana ne bujitu kampànda bwà dyambula.

<sup>49</sup> Paùdi—paùdi uufika ku—ku disungula mukajèèbè, bwà kubwela mu dibàkà, anyi kusungula bàyeèbè, bìdi bikèngela bwà wèwè—wèwè kwambula bujitu kampànda. Ne díbà adi udi ne cyà kuvùluka... Pàmwàpa udi wibaka nzùbu; nznùbu mwímpè mulenga kumòna. Nènku díbà adi, vùlukà ne, wèwè bu mukàji musèla, bikèngela wèwè kwelangana meeji pa bujitu bwà kukolesha bânà. Ne bikèngela wèwè kwelangana meeji ne bimanu bilenga, bifinùnùke abi nebìpetè tuumifùndù tukesè, tufùnda ne byanza ku bimanu kwônso aku. Pashiishe udi ne bujitu bwà kulongesha bânà bèèbè abu tùlaasà. Udi ne bujitu bwà kubàvwàdika ne kubàdiisha.

<sup>50</sup> Byônso mbujitu bwambula. Ne bitu bipeepèle menemene, pàdi majitu àkwimanyina, bwà kuèpela. Nènku tudi tusangana ne dibàkà mbujitu bwà dyambula, mu mìshindù yônso.

<sup>51</sup> Nànsha mene, misangu yàbúngì, tudi tusangana... Eci ncicolè bwà kucyàmba, kàdi mbulelèlè ne, bambi, misangu yàbúngì, bàtu bànyeema bujitu bwà kutwà Díyi dyà Nzambi nyama ku mikòlò pàkaadìbo bákungamangana naaDì. Nebànyeemè bujitu abu. Pàdi Bulelèlè bwà Díyi dyà Nzambi bùtwàdiibwa mpàla ne mpàla kùdi bantu, tudi... tutu ne meeji a kwepela kwalukila cyànyimà too ne mutùdi tukashiikila.

<sup>52</sup> Ndi mfùma ku dijikija muyiiki ne mwànà wa balùme wa mwanèètù kuntu kwàka. Yèyè mmwena Kàtòlikè, ne ùdi... Nènku mvwa mubàtiize mwànà wa balùme awu, mu Dìna dyà Yesù Kilistò, kukàadi ndambù wa bidimu kaaba aka,

kàdi kukapetanganayè ne nsongààkàjì kampànda mukèsè ne kwalukilayè mu Kàtòlikè. Kàdi mvwa mukwàte cyanza cyà mamwëndè pàvwàye ùpùnga ne lufù kuntwaku. Kungambilayè, mèyì a ndekeelu ne: “Tàngilàku bwalu bwà Melvin.” Kàdi yèyè ùdi ùlòòta ànu bilòòtà cyanààna. Kàyi ànu mwà. . .Ditukù dyònsò, dyònsò dicyacyà dīlīlā edi, lumingu lushààle elu, ùdi ùlòòta ànu bilòòtà. Yèyè ne: “Ndi mubwelè mu èkèleeziya webè amu, Papa Bill, ne wèwè uvwa mwimàne mwaba awu mwikàle uyiisha. Mémè kulwa lubilu kumpàla aku, bwà kubanga dyanza dyà ditonda. Ngumba ntàbuluka.” Yèyè ne: “Ndi—ndi mupīle.”

Mémè ne: “Melvin, kabyèna bikukèngela dyumvwija nànsha dikesè bwà aci to. Mwaba webè nkwòkò aku kùdi kukukùmbànyine.” Ncyà bushùwà’s. Nwamònu anyi?

<sup>53</sup> Kàdi bwà kukùngamangana ne majitu a dyambula, bìdi misangu mikwàbò bikèngela bàtùvùlè ànu cisèbà ciinè, bwà kwenza nànkù’s. Bu taatù, bwà kukùngamangana ne bujitu bwà dyambula, bwà kwela mwanèèbè mfimbù. Bânà bakesè abu, kwèna muswè kwenza nànkù to. Kàdi wèwè bu taatù anyi bu maamù, bikèngela ùkungamanganè ne bujitu bwà kukolesha mwànà awu, bwalu Bible mmwambè ne: “Lamà lukodi nènku neùnyangè mwanèèbè wa balùme awu.” Ne aci cìcidi cishààle ànu cimpè kumpàla kwà mumanyi yònsò wa maalu a nsòmbelu udikù pa buloba ewu. Aci cidi cishààla ànu Bulelèlà bwà Nzambi. Bu nè byà nànkù awu bìvwakù bitàmbe kwenjiibwa, katùvwakù bafwànyine kwikala ne dilekelelangana dyà bânà búngi cyanààna ne bikwàbò ebi, ne dibola ditùdi naadi pa buloba leelù ewu edi to. Kàdi kanungu kàà kale kàà ngòlò kàà mu dīkù aku kàkaadi kashipiibwe, kùkaadi ntàntà mule, ne bàkaadi bàlekela bânà benza cyònsò cidìbo bóbò baswè kwenza aci.

<sup>54</sup> Kàdi nànsha múngàmbì amu ne, bambi, bàdi bàtuutakeenangana ne Bulelèlà mpàla ne mpàla, kàdi dībà adi bàBwèpuka. Nwamònu’s, bàdi—bàdi ànu ne. . .Mbimwèke ànu bu ne kùdi caintu kampànda cidìbo—kabàyikù baswè kukùngamangana naaci to.

<sup>55</sup> Misangu yàbúngi nkàadi mupetèpète bantu balwè, bàmba ne: “Ndi mumanyè ne aci ncyà bushùwà, Mwanèètù Branham, kàdi mémè mwenzè aci, s’mbafwànyine kungiipata mu èkèleeziyà.” Kàdi mbwalu anyi? Kùyi mwenzè nànkù to, s’nebàkwipàtè, muulu Mwàmwa. Pa nànkù bikèngela wipaciibwèku, mwàba kampànda, nwamònu’s. Pa nànkù’s mbipiìibwe ne wèwè mukùngàmàngàne naaci, pamutù pàà kucinyeema ne kwamba ne: “Èè, nēnye eku nūnku. Ncyàkwalukila to.” Alùkilà, bushùwà, tèelejàku bikwàbò byà ku Cyòci aci.

Kenkètaayi mu Mifundu. Yesù wàkamba ne: “Kenkètaayi Mifundu, bwalu mu Yòyi amu mmunùdi nwela meeji ne nudi ne Mwoyi wà Cyendèlèlè, kàdi Yòyi ayi’s ki Yidi yimfidilà

Mémè bujaadiki.” Kàdi tudi tusangana ne bantu kî mbaswè kukùngamangana ne cyòci aci to.

<sup>56</sup> Bafikishiibwe, e kubwejiibwa mu Bwikadi bwà Nzambi, ne kumòna pàdi Nzambi mufile mulayi, ne Nzambi mmuswikiibwe ku mulayi awu. Ne pàdiYe ùfikisha mulayi awu ku dzenzeka, díbà adi bantu bàdi ne bwòwà bwà kukùngamangana ne bujitu bwà kulonda Mukenji wà díbà. Tudi tusangana aci myaba yònsò.

<sup>57</sup> Kàdi bishi nwènù ba-Luthériens? Mba-Luthériens búngi kaayi bàakaciina, bantu bàakaciinà bwà kukùngamangana ne Bulelèlà bwà Luther pàakapàtukaye ne dibingishiibwa apu? Tàngilàayi nùmonè cyàkanùlòmbàci, pàmwàpa mwoyi wèbè sungasunga, bwà kupàtuka ne kujikula Yesù Kilstò ne—ne ku—kulwa Luthérien.

<sup>58</sup> Ditàngilaayi nwènù ba-Méthodistes, mùvwàbi kale wàwa ne, mùvwàbo bànùbiikila ne mbansantu babùnguluki bàà mu malaba. Ngeela meeji ne nuwà bamanyè aci. Nènku bàvwa bàbwela mu Nyumà, ne bàdikùpa eku ne eku. Bàvwa bàmba ne bà—bàvwa ne “didikùpa.” Ba-Méth- . . . Aci, bwàla, kabàvwa beena Mpenta to; bàvwa mba-Méthodistes, kùkaadi bidimu byàbúngi. Nènku bàvwa bàdikùpa, ne bànùkùka, ne bàdishinda bwà bukolè bwà Nzambi. Ne bàvwa bàbèèla màyi mwísù, ne bàbèèla kapeepà ne bipèepudi, bèèla meeji ne bàvwa bafwè cipùkà. Nènku, mpindyewu, s’bàvwa bànwàngata bu musumbà wà bansantu babùnguluki bàà mu malaba. Kàdi nuwà, baamamwènù ne baatatwènù, s’bìvwa bìbàkèngela anyi kuCùtaba, kukùngamangana ne Bulelèlà ne maalu àvwà ènzekà, anyi bàbùdyombola.

<sup>59</sup> Twàmbè bishi bwà nwènù beena Mpenta bàakapetà dyalujulula dyà mapà aba, pàakapàtukà dibàtiiza dyà Nyumà Mwímpè, ne dyakula dyà mu myakulu, ne mapà a Nyumà miikàle àalukila mu èkèleeziyà apu? Mòna’s, ba-Méthodistes’s bàvwa baswè kunwipata, ki kucyenzabò. Kadi’s byàkakèngela bwà nwènù kukùngamangana naaci. Cìvwa ncintu kampànda cìvwa cikèngelà bwà nwènù kwenza.

Kàdi bishi bwà bwalu bùdi panshi ebu, pàakapàtukàbu, bwà dibàtiiza dyà mu Dìnà dyà Yesù Kilstò, ne nwènù kumòna ne cìvwa m’Bulelèlà? Bìkèngela nùkungamanganè naaci, anyi nwènzè cintu kampànda pa bwalu abu.

Nudi ne bujitu bwà dyambula, muntu ne muntu, ne nudi ne cyà kukùngamangana ne bintu ebi. Eyo.

<sup>60</sup> Ne panùdi numòna díbà adi, mu ditùkù edi mpindyewu ne, pàdi Dìyi dyà Nzambi difile milayi yà bintu bitùdi tumòna byènzeka mpindyewu ebi, díbà adi’s tudi ne bujitu anyi bwà kukùngamangana naaDì anyi bwà kuDyèpuka. Wèwè udi ne . . . Kwènà ànu mwà kushààla kùyi ne kùdi to. Bìkèngela wènzè cintu kampànda bwà Cyòci aci. Mbambè. . . Bìkèngela kwènjiibwèku dinyungakaka kampànda.

Kwêna mwà kubwela mu ciibi cyà èkèleeziyà aci kàdi kupàtuka muntu ànu umwèumwè ùvwà pawàbwedi awu to. Anyi udi mutàmbe kuya kule, anyi mutàmbe kuseemena pabwîpi ne Nzambì, musangu wònsò wûdi ubwela anyi wûdi upàtuka.

<sup>61</sup> Kaa, mùshindù mwinè wûdìbi bipeepèle bwà bantu kunyeema bintu ebi's wè! Nènku ndi muswè bwà twèlanganèku meeji pa maalu aa patwàbwela mu masangisha a menemene mààlabà dilòòlò, ne, ndi muswè bwa nùmonèku pàdi cintu kampànda bàkùngamangana naaci, bu nwènù. . .piikalàku lukonko kampànda pa bwalu abu. piikalàku lukonko kampànda pa bwalu abu, kùdi ne cyà kwikala dyandamuna.

<sup>62</sup> Twàmbèbi, cileejilu ne, mvwa mwambè ne mvwa nya ku wesètè, kàdi wèwè kumfunkwina mu *nùnkù*. Èè, katanci aka, ndi mufwànyine kuya kupita too ne cìmvwà ndumbila aci, ne mèmè mutàmbe. . . ndi muyè ku nord-ouest. Èè, kàdi bu muntu mwà kumfunkwina mu *nùnkù*, kàdi mèmè nya mu nàka? S'nèmpitè cyàkàbìdi cìmvwà ndumbila aci; ndi muyè ku sud-ouest. Èè, pàdiku ànu lukonko, lwà ne ku wesètè nkwepi, kùdi ne cyà kwikala dyandamuna dyà buludì mwaba kampànda.

Nènku pàdi nkonko eyi yikùngamangana neetù, pa bìdi bitàngilà Malelèlà a Bible, kùdi ne cyà kwikala dyandamuna dilelèlà mwaba kampànda. Aci ncyà bushùwà. Dìdi ne cyà kwikalakù.

<sup>63</sup> Nènku patùdi tumòna Cintu kampànda cileejibwa, ngeela meeji, pamutù pàa kunyeema ànu cyanààna, wamba ne: "Aa, macimbu's wè! Mèmè ncyèna mufwànyine kwitabuujaku cintu bu Aci to. Ncyèna mufwànyine kwitabuujaku Aci to," bwà cinyi kùyikù wangata Bible, ne usòmbela panshì ne ukùngamanganakù naaCi? Cìlongè's. Wèwè udi kaaba aka mu disangisha mpindyewu ewu, Cìkenkètè ànu cyanààna. DìkenkètèlèCi, wèwè mwinè, ku Dîyi. Kenkètà Dîyi, ku Dîyi. Awu ki mùshindù wùmwepelè wà kuDìfikisha ku dyamba Bulelèlà. Ne Dìdi ne cyà kwamba Bulelèlà, kuumukila ànu ku Genèsè too ne ku Bwàkabuulwibwà.

<sup>64</sup> Kìlistò ndibuulula dyà Bible mujimà. Munda Mwèndè, Kìlistò, mmùdi kaabujimà kònsò. Kuuja kwà biprofètà byònsò byà Bible kùdi kùsanganyibwa mu Kìlistò Yesù kakùyi byà mishingà to, bwalu Yèyè ùvwà Nzambì mumwènèshìibwe mu mubidi.

<sup>65</sup> Mpindyewu patùdi tusangana bintu ebi, nànsha nànkù, patùdi twètù tukùngamangana naabi ne tubwela mu disangisha, ne tumòna Bukolè bwà Nzambì bùkwàta mudimu ne bwènta bintu, ne bwènta byenzedi bitàmbe mfùkilu, ne twètù tubimòna byènjiibwa, ne tutàngila mu Bible ne tumòna ne mbilayìibwe bwà dîbà edi; pashìishe patùdi tumòna biinè bintu abi, dîbà adi's tudi tukùngamangana ne bujitu anyi bwà kuciitaba, mùndi njinga kwamba's, bwètù twètù biinè.



66 Mpindyewu, bantu bààbùngì bàdi bàdya naaci bulundà, bantu bààbùngì bàdi bàmba ne ncyà bushùwà. Kàdi aci kacyèna—aci kacyèna cìcìvwija cìdì. . . Aci kî ncintu cyûdì mwambwile bujitu to. Ànu mûngâmbì ne, kàdi bu kwòkù mwà kwikala. . .

67 Bu ne mvwa nsongààlùmè wa citende, mwikàle nkèba mukàjì, bwà kubwela mu dibàkà; kàdi ki nsongààkàjì nyéyè ewu mwimàne apa mukùmbàje ngiikàdilu yònsò ùmvwà mémè ndyàmbidila ne nguvwa ukèngediibwa bwà mukàjì awu. Mòna's, bwà bìdì bitàngilà nsòmbelu yéyè awu mwikàle mukalenge-mukàjì, ne mulenga kwísù, ne—ne buumùntù bulenga, mwena Kilistò mulelèlè, cyònsò cìmvwàku mémè ndyèlèlè meeji, bwà kwenzacì mukàjì mwìmpè bwànyì mémè aci. Nànsha mùndì ngamba ne mmupwàngane, mukùmbànàngàne menemene amu, yéyè kèna ànu wanyì to pàndì nciyi mumwitàbe ne ngambula bujitu bwà ne mmukàjàànyì.

68 Ncintu ànu cìmwècìmwè aci cìdì Mukenji. Wèwè udi mufwànyine kwamba ne: “Ngwà cyà bushùwà, anyì *cikampànda*, *cikansanga*, anyì *cikankènga*.” Ne kwamba ne: “Ndi naaWù bulundà, ndi mwitàbùùje ne Wùdi Bulelèlè.” Kàdi bikèngela ùWitàbè; ne bikèngela Wòwò awu wùlwe citùpà cyà ku wèwè, ne wèwè citùpà cyà ku Wòwò. Bìdì bikukèngela. . . Dìbà adi, Wùdi wèbè wèwè.

69 Paùdì usèla mukàjì kampànda ùdì musungùle ewu, dìbà adi nudi—nudi umwe.

Ne mùshindù awu ngùdì ne Kilistò. Paùdì uMumòna mumwènèshìibwe ne muvwijìibwe wa cyà bushùwà, dìbà adi udi citùpà cyà ku Yéyè, ne Yéyè ùdì citùpà cyà ku wèwè. Nènku, bònsò pàmwè, nudi citùpà cyà Mukenji.

70 Kaa, bùngì bwinè bwà màzuwà a cyena-màngumba atùdì naawù àdi àya matàngile ku Taashishì, bwà ba-Yonà bàà matùkù aa's wè, nkàmà citèemà cijimà, ne byà mu njila, màzuwà àdi àngatà njila wa maalu mapeepèle awu. Kî mmaswè kukungamangana naaci to.

Yona kàvwa muswè kukungamangana naaci to, cintu cyà diya kùdì bàà Bisàmbà byà bendè aci. Yéyè kàvwa muswè kuya ne Mukenji wa cikisu awu kuntwaku to wà ne: “Mu matùkù makùmi ànaayi, nenùbutukè panwikalà kanùyì banyingàlèle.” Bìvwa bimwenza bibì ku mwoyi bwà kwenza nànkù. Ki kudyàmbidilayè ne: “Bantu bàà Bisàmbà byà bendè bàba, s'mbikolè bwà kumanya cyàngenzelàbo.” Kàdi's bivwa bikèngela bwà yéyè kukungamangana naaci. Nwamònu anyì? Kàdi kwangatayè màzuwà à maalu mapeepèle e kuyayè mutàngile ku Taashishì, kupwekayè mwinshì mwà màzuwà ne kudyùpwilayè mu tulù; mwàngàte njila wa maalu mapeepèle.

71 Nnjila wa maalu mapeepèle, nnjila mwanyìshìibwe kùdì bantu. Mbipeepèle bwà kulonda njila udi muntu yònsò mwà

kukutuuta cyanza paanyimà ne kwamba mùdi muntu mwîmpè ne: “Ewu *Nkampànda* ne *Kansanga*,” ne bàà pa buloba bàkutàngila. Mbipeepèle bwà kulonda njila udi mwanyishìibwe kùdi bantu.

Kàdi pàdibi—pàdibi bikèngela bwà wèwè kwenza cintu kampànda cyà cishìilàngàne, pàdibi bikèngela bwà wèwè kwimanyina pa byùdi mutwishìibwe ne ki byùdi mumanyè ne m’Bulelèlà abi, ki mwaba wùdi bwalu bukolè ngawù, ki pàdi dikuuyakana dîlwa mpòpò apu, mwaba awu mene.

72 Kaa, ànu mutùkaadi bimbimbe musambu wà kale awu ne:

Mùshindù mwinè wùdibi bipeepèle bwà  
kwendesha bwátù pàdi máyì mabùtáme,  
Bwà kwikala mweyèmène dikànda dyà dibòkò  
dinènè dyà Yèhowàh.

Kàdi, kaa, mavwala àbangè ànu kutuuta, ci—cipeepèlè cituutè ne cilundulè mavwala awu, díbà adi udi wenza cinyi?

73 Cintu kampànda cifwànàngàne ne cyàkandondelàbo, musangu kampànda, cyàkambà inàbànzà kampànda. Kale wàwa mu matùkù a tubalù ne matempu, kwambayè ne kabalù kunyeemakù e kuya nendè, mwikàle ùmukila ku èkèleeziyà. Bòbò kwamba ne: “Wèwè kwenza cinyi?”

74 Yèyè ne: “Ngàkeeyemena Mukalenge too ne mwàkalwà nshinga kukòsekayi.” Èè, ki díbà dyà kweyemena Mukalenge ndyadi, paanyimà pàà yònsò. . . paanyimà pàà nshinga mimanè kukòseka. Udi wèwè weyemena nshinga too ne pàdìyì yikòseka. Èyowà.

75 Nènkù tudi tusangana ne tudi ne njila yà maalu mapeepèlè yàbùngì yà kuya, màzuwà àyaaya matàngile ku Taashishi, bwalu mbipeepèle, dipanga dyà dyambula dyà majitu. Bìdi ànu bìdìyiila’s, udi ne bintu byònsò bìlwa; bantu bònsò bakunangè. Nènkù, bantu bònsò, wèwè udi. . . Muntu nànsha umwè kàyi ùbènganganakù neebè to; wèwè kùyi ubènganganana ne muntu nànsha umwe to. Mpindyewu, aci cyòci kacìyì mukùsù wà disukula naawù malòngò’s! Ncyà bushùwà’s. Èyowà, muntu wa kalèndàlèndà, mbata mupooyòyòye! Mòna’s, muntu kanà yònsò, nànsha wèwè mwikàle nganyi, ne cyùdi utwà nyama ku mikòlò. . . Mu bushùwà bwà bwalu, bantu bàà ngeelèlù wa meeji wa kaneemu nebàtambè kukutwà mushinga bu wèwè mwà kwimanyina pa byùdi mutwishìibwe ne mbilelèlà abi. Cyà bushùwà. Nànsha byòbì. . .

76 Angatà mukàjì kampànda, mmufwànyine kwikala kàyi ùtamba kukòka ntèmà to, ne cyònsò cidìye aci; kàdi mukàjì awu àtwe méyì-makùlù a bukàjì nyama ku mikòlò, imanè bu inàbànzà; ne muntu mulùme yèyè ànu ne bulùmè bwètù bwà cyà bushùwà ebu mu yèyè, neàtwè ku cyà mukàjì awu. Kakùyi mpatà to. Tudi twanyisha cintu kampànda cidì—cidì muntu kampànda

naaci, cidiye wìtabuuja ne mbulelèlà ne muswè kutwà cidiye wèla meeji ne ncilelèlà aci nyama ku mikòlo.

<sup>77</sup> Mùshindù mwìnè wùdi beena Kilistò bapìtèpìte bungi leelù ewu, batundùbile, batekètàngàne bu nsàbangà wa cinshidimba, mu mùshindù wà ne badi bèèla meeji ne cyònsò cìdìbo pààbò ne bwà kwenza cìdi ànu kukashààla bàà mu èkèleeziyà kampànda, kubwela mwaba kampànda, kufùndisha mènà mu mukàndà wà mènà, anyì kwenzakù kaacintu kampànda, bàtùpika bàya muulu bààlukila, bèèla mbilà, anyì—anyì cintu cyà mùshindù awu, kàdi bacibùikila ne mbwena Kilistò.

Bwena Kilistò nnsòmbelu wa ku ditùkù ne ku ditùkù, mukàyàpàle, mwikàle ne mwoyi bwà Nzambì mu . . . buloba bùdiku mpindyewu ebu. Ndilàkuka dyà díbà dyònsò dyà Kapyà ne dinanga dyà Nzambì, mu mwoyi, dìdì dikulàkusha kapyà ne dikutèèka kuntwaku pàmwè ne bantu, mwikàle ufikisha bantu ku dikùdimuna micimà kùdi Kilistò. Dyambula dyà majitu.

<sup>78</sup> Kàdi mbipeepèle bwà kulonda njila udi bàà pa buloba bàya. Mbipeepèle bwà kupweka ne nkwaka wa musùlù.

Ndà kwàka ukasòmbè mu musùlù, ne bwàtù bwèbè. Angàtà nkahi yèbè ne bangà kwita mutàngile kùdi màyi àfùma; kwèna wenza mutancì mule to, bìdì bìkukolela. Kàdi lekèlèlà anu nkahi ayi musangu wùmwè kàdi ùmomè mùdi upita micì lubilu lwà dikèma, wenda upweka, kàdi tàngilà kùyaayà aku!

Pàdi bintu bilèlema bipeepèle, vùlukà ne, udi uya mutàngile ku—ku cìsàbàsabà cinène kwìnshì aku, cyà mùshindù kampànda. Uyàaya mutàngile ku cibila, ne kwàkunènga to neudyèlè mu cibila amu. Mulèlème ànu cyanàànà pàmwè ne bàà pa buloba, bipeepèle, mùyaayàbo amu, wèwè kwèna muswè nànkù to. To, mukalenge. Kàdi udi ne cyà ku- . . . kwitaba bujitu bwèbè bùdi ne cyà kwambula.

<sup>79</sup> Mpindyewu, wèwè udi uCìitabuuja, ne udi ne ka- . . . Udi wela meeji ne Cìdi Bulelèlà.

<sup>80</sup> Ne bujitu bùdi Nzambì mutùpèèshe mu ditùkù edi, bwà kutwàla Mukenji ewu! Nènku pàndì ngenda nkùlakaja, ne mumanyè ne matùkù àànyì àkaadi ènda ipidika, ndi ngumvwa bujitu abu bunène kutàmba múmvwà ngumvwa kacya kwònsò eku amu. Biikàle tukolesha, ki citùdi ne cyà kwenza! Tudi ne cyà kudifilakù, kwònsò kutùyaayà, kwambilangana Mukenji; ne—ne kwambila bantu ne Yesù Kilistò ùlwalwa, ne Yèyè ki Nzambì ne Yèyè ùlwalwa kàtààtakà. Kí nkushààle di—ditèkemena pa buloba to pa kuumusha Dilwa dyà Mukalenge.

<sup>81</sup> Pàndì ntùma mèsù paanyimà pààpa kùdi balundà kampàndà bàvwà naanyi kuntu kwàka pàvwà Mwanjèlo wa Mukalenge. . . Nsongàalùmè yìdì misòmbè kaaba aka eyi, ndi ngiitabuuja ne mbapètè mwaba wùvwàci cyenzèkèle kuntu kwàka. Nènku vùlukàayi ànu cìvwà Mukalenge mwambile Mwanèètù Wood, ditùkù adi aci. Ùvwa wenda ubànda kakùnà aku. Ne—ne yèyè

ùvwa bu udi udila mwadi, bwà mukàjèndè uvwa usaama. Ki Mukalenge kwambaYè ne: “Angùlà dibwe dyàdya ùdikùpè muulu mu lupeepèlè, wàmbe ne: ‘EMU MMÙDÌ MUKALENGE WÀMBA.’” Ki mèmè kwenza nàнку. Ne Mwanèètù Wood nyèyè ewu musòmbe bu ntèmù.

<sup>82</sup> Ki mèmè ne: “Mwanèètù Wood, kakwàkunènga ntàntà mule to kùyi mumòne cintu kampànda cyenzèke.” Ki ditùkù dyàkalondà, patùvwà biimàne mwaba awu, twètù bònsò pàmwè. . . Ne musùmbà wa bantu bàdi biimàne kaaba aka mene dilòlò edi aba.

<sup>83</sup> Muiiishi kampànda wa citende ùvwa mwab’awu, ne ùvwa. . . Mvwa mumòne. . . Mvwa mufùme ku ditwilangana nendè dilòlò divwa didyànjlile adi. Ùvwa mu citùùdilu cyètù. Ùvwa mulwè bwà kwikala neetù. Ki kungambilayè, wàmba ne: “Mwanèètù Branham, utukù umòna bikèènà-kumòna, paùdi mupàtùke mùshindù ewu anyì?”

<sup>84</sup> Mèmè ne: “Èyowà’s, mukalenge. Kàdi ndi mupàtùke mulwè mwaba ewu mbwà kubyèpuka, bwà kwikishakù ndambù.” Yèyè ne. . . “Èè,” mungàakamba, “ndi—ndi. . . Mu bushùwà bwà bwalu, Yèyè ùtu ùndeeja bintu pàndi mupàtùke apa.” Ki mèmè ne: “Ànu pa kakùnà apa, mwaba wùvwà Banjèlo mwandamutekète bamwènèkèle *muntwamu* awu.”

Yèyè ne: “Èyo, ngùmùvù.” Yèyè ne: “Mèmè mvwa umwe wa ku bakutùùdidi bàà mfrangà bwà kwenza disangisha dyèbè mu Californie mwàmwa.”

Mèmè ne: “Èè, ncyà bushùwà ne ndi ne disànkà dyà kumanya nàнку.”

<sup>85</sup> Nèku patùcìvwà biimàne mwab’awu apu, ànu dībà adi mèmè kukènzakana e kumòna bu ngàngàbukà kàmpànda munène wa katankù ùmutàngila mu mèsù, ne mèmè kumuumvwa wàmba ne: “Neùjimijè dísù adi, bwalu kùdi disunsuma kampànda muntwamu. Ne ndi mudyòndòpe munda mwà bidimu bibìdi, kàdi neùjimijè dísù adi.”

Mèmè ne: “Cìdi cyenzè ne ùngeele lukonko alu, mbwalu ngàngàbukà webè mmukwambile ditùku adi ne neùjimijè dísù adi.”

Ki yèyè ne: “Ncyà bushùwà,” kadi kukènzakanayè mùshindù *ewu*.

<sup>86</sup> Ki mèmè kumòna mamwéndè ùvùùla lùmwè lwà ku nshèsheetè yèndè ne ùleeja dikàsà dyèndè, kwikàle tuubyùjà tukesè tulembèlèlè munkaci mwà bânà bèndè bàà nkàsà, myaba yònsò ku mukòlò aku, wàmba ne: “Wèwè mumòne Mwanèètù Branham, ùmwambilè àsambilèku bwà cyòci eci.”

Mèmè kwamba ne: “Mamwèbè kwololayè cyanza. . . kutèekayè mukòlò mùshindù *ewu*, ne kwambayè mùvwàye ne. . . mùvwàye ne tuubyùjà tukesè ku bânà bèndè—bèndè bàà nkàsà

kwônsò aku, ne mùshindù awu, ne kwambayè ne: ‘Wàmbilè Mwanèètù Branham àsambilèku.’”

Yèyè kwamba ne: “Mwanèètù Branham, aci mbulelèlà.”

<sup>87</sup> Mémè kutàngila paanyimà. Pângàakatàngilà paanyimà apu, mémè kumumòna mwimàne mwab’awu muntàngile, mùshindù ewu, ne mèsù èndè miikàle ànu àbàlakana. Ndi mutwilàngàne nendè mu movù wà mabèji àpòòpoka ewu; ùvwa ne mèsù mîmpè kutàmba a muntu kanà yônsò ùvwa mu citùùdilu amu. Mukalenge ùvwa mumwondòpe ne mumusàngàje.

<sup>88</sup> Pàmvwà mwimàne mwab’awu apu, Mukalenge kwambaYè, kundeejaYè cìvwà ne cyà kwenzeka. “Dinyooka didi dyàmba kutuuta Côte Ouest.” Ki kwambaYè ne: “Ndà kuntu kwàka, ku luseke lwà mafùwà aku.”

<sup>89</sup> Nènku mvwa ne cikàsù mu cyanza; mémè kuyakù. Ki Mwanèètù Roy Roberson, twètù bônsò tudi bamumanyè kaaba aka. Kènàpu dilòlò edi to, ku dyànyi dimanya; ùdi mu Arizona mwàmwa. Yèyè ngudi mulombodi wa balubuludi kaaba aka, ne mvwa mumumanyè bu nkòlomù. Nènku cintu kampànda cìvwa mwà kwenzeka; dindà dilenga dyà dikèma, dyà kuulu kotalàle, lwà pa dîbà dikùmi wa dindà. Nsongààlumè ayi mu nyùngulukilu mwônsò amu, twètù dikùmi anyi dikùmi ne bàbìdi, munkaci mwà kutùùlakaja ntentà, ne kusaaya ngulube, ne bikwàbò. Ki twètù. . . Mémè kunyùnguluka, mémè ne: “Roy, sokòmaayi, lùkàsà. Cintu kampànda cidi cyàmba kwenzeka.” Ncìvwa mwà kumwambila cikwàbò cintu to. Kàdi anu dîbà dîngààfikì kwòkò aku. . .

Ki kufùmakù mu maulu mvùnda wa Nzambì, ne kutuutayè, bu kàpatà nàнку, kunyùkushayè kakùnà aku, kubwela lubilu munda mwà mukùnà awu, kwela mushoonyi mu nyùngulukilu wawù mwônsò amu, bu mètre mujimà ne citùpà kumutù kwànyi nàнку, kukòsayè nsongo yônsò yà micì ayi, pàvwà mabwe àlamuka apu. Kubàndayè muulu mu lupeepèle kàdi kupweka cyàkàbìdi, ne dibàtiiza dikwàbò dinène, ne kutuutayè nseke yônsò yà mukùnà awu, ne kukùpayè mabwe mùshindù ewu. Kwenzayè nàнку misangu yìsàtù, ne pashìishe kubàndayè muulu mu lupeepèle.

Ki Mwanèètù Banks kulwayè kùndi, wàmba ne: “Ki ciinë cyùvwà mwambè makèlèlèlà aci anyi?”

Mémè ne: “Èyowà’s, mukalenge, ki cyôci aci menemene.” Nwamònu anyi?

<sup>90</sup> Ki pashìishe matùkù abìdi paanyimà pàà cyôci aci, Alaska mujimà, kwambayè kutùkina, kuntwaku. Ne myaba yônsò mu Côte Ouest amu mùvwa mikungulu ne minyùkunyuku, ne byônsò munkaci mwà kwenzeka. Nènku dìmwe dyà ku matùkù aa yèyè nèaselemukè àye mwinshì mwà mbù. Cyà bushùwà. Ncinyi ciinë aci? Tudi ne mwoyi mu dîbà dyà Dilwa dyà Mukalenge.

<sup>91</sup> Tudi tumòna tusùmbù ne bikwàbò bijuuka, ne bintu bishiilèshiiàngàne byònsò ebi, tudi bamanyè ne kùdi ne cyà kwikala dyandamuna dilelèlè ku cyôci eci.

Kùdi bantu kaaba aka mu ditùnga edi mpindyewu, bàbwela mu nyòngòlò ne bikwàbò ne: “Nènku mu matùkù 16 a ngondo mwisâtù,” munùdi bacibalè mu cibèjibeji, “Mukalenge ùlwalwa.” S’nudi bamanyè ne kabyèna nàнку.

Yesù wàkamba ne: “Muntu nànsha umwe kî mmumanyè kasunsa anyi dîbà adi to.”

<sup>92</sup> Patùdi tumòna bintu byònsò ebi, ne maalu ènzeka mùdiwu ènzeka emu, ne kùdi ànu ne cyà kwikala dyandamuna dilelèlè mwaba kampànda. Kùdi ne cyà kwikala Bulelèlè kampànda. Kùdi umwe, esètè; ne umwe, wesètè; kàdi kùdi umwe, sud-est, ne nord-est, anyi cintu kampànda. Kàdi kùdi ne cyà kwikala dyandamuna dilelèlè, mwaba kampànda, ku nshinga awu. [Katùpà kàà mukàbà wà mèyi munda mutupù—Muf.]

<sup>93</sup> Kwepele eci anyi? Tudi ne cyà kwambila bantu ne tudi ne mwoyi mu mèbà a Dilwa dyà Mwànà wa Nzambi. Tudi baswè—baswè kwikala batàbàle ne (Nzambi) biimànyine kuulu, dîbà dyònsò, badìlongòlòle bwà kupèèsha muntu dyandamuna dijaalàme.

<sup>94</sup> Bitu misangu yònsò ànu mùshindù awu. Ki citù—ki citù mu muntu, ùkaadi mwepèlèpèle ne muyàyàaye kule ne Nzambi, kacya ànu ku Adàmà, mu budimi bwà Edènà. Pàvwà Adàmà mu budimi bwà Edènà, pàakafikàye ku dyambula dyà bujitu bwà kwenzayè disungula dyèndè apu, yéyè ùvwa mufwànyine kushààla ne Nzambi anyi kuya ne mukajèndè? Bivwa bikèngela kwenzayè buj- . . . bivwa bikèngela kwenzayè aci, bu—bujitu abu bývwa bulààle kùdiye yéyè. Bivwa bikèngela anyi kwangatayè civwà mukajèndè mwambè anyi civwà Nzambi mwambè. Kàdi pàakasungulàye bwà kulonda njila wa mukajèndè, ne pàakenzàye aci, dîbà adi ki kujimijayè ngiikàdilù wèndè wa ku cibangidilu awu. Ne wàkafikisha muntu ne muntu wa pa buloba bujimà ku lufù, pàakakèngelàbi bwà kwambulayè bujitu abu, anyi kwitaba bukènkè bupyabùpyà bývwa mukajèndè mukapètè, bývwa bubèngàngàne abu.

Èyi Nzambi! Anji elàngànaayi meeji pa bwalu abu. Nzambi wàkabàpèèsha ànu mèyi matwè ku mwandamukùlù anyi dikùmi cyanàànà a kulama. “Kàdi kanùdi ku mucì wàwa nànsha.” Ki cyònsò civwà cikèngelà kulamabò ncyôci aci. Ne nànsha mene ànu ne Dìyi búngi abu adi, bòbò kuDishipa.

Dîbà adi bivwa bikèngela bwà Adàmà kukùngamanganayè ne: “Nèngènzè—nèngènzè mùdi mukajàanyi mwambè bwà kwenza, anyi nèngènzè cidi Nzambi mwambè bwà kwenza?” Kàdi kupàtukayè mupandè mèsù’s. Bivwa bikèngela bwà kwambulayè bujitu abu. Aci kukùpaci bukwàbantu bwònsò nkòong mu lufù.

<sup>95</sup> Pashiishe kulwakù mukwàbò Adàmà awu, uvwa Kilistò, kacya kakùvwakù nànsha umwe bu Yèyè to! Muntu kampànda wàmba mùvwàYe kàyi Nzambì? Bunkààya Bwèndè's bwàkajaadika mùvwàYe Nzambì. Kacya kakùvwakù kwanji kwikala cifùkiibwà cìvwàku ne mwoyi bu Yèyè to. Yèyè wàkiikala ne mwoyi mu buloba bwà Nkààyèndè. Wàkalediibwa pambèlù pàà cipaapu cyà muntu wà mu bufùki, wà bubì awu. Alèluuyàh! Yèyè ùvwa Mufùki Yèyè mwinè muvwijìibwe mubidi.

Nganyi uvwakù mufwànyine kwimana mwaba wàkiimanàYe Yèyè awu? Nganyi wàkaakulakù bu Yèyè? Nganyi uvwakù mufwànyine kwamba bintu byàkambàYe Yèyè? Nganyi uvwakù mufwànyine kwenza bintu byàkenzàYe Yèyè abi? Bunkààya Bwèndè's bwàkajaadika mùvwàYe Nzambì. Kakùvwa mupròfetà anyi cintu cikwàbò nànsha cimwè cìvwàku mwà kwenza byàkenzàYe Yèyè abi to; Yèyè ùvwa mwà kubiikila bafwè bwà kupàtukabò mu lukità, ne Ùvwa mwà kwimanyika maulu, ne kwenza cintu cìvwàYe muswè kwenza aci. Yèyè ùvwa Nzambì. Nganyi uvwakù mufwànyine kwimana pa kaaba Kèndè? Nganyi? Yèyè ùvwa mwà kwikala cinyi's pa kuumusha Nzambì mupwàngàne, wa kàyi ùfwà awu, muvwijìibwe mubidi ne musòmbèle munkaci mwètù!

<sup>96</sup> Kacya cintu nànsha cimwè kacyaàkafwànyikijiibwakù Nèndè to. Yèyè ùvwa ne mwoyi mu buloba bwà Nkààyèndè. Kacya muntu nànsha umwe kààkaakulakù bu Yèyè nànsha. PàvwàYe ànu útùbula Mwèndè mukana cyanààna, kùvwa cintu kampànda pa bwalu abu, cìvwà cishìilàngàne ne cyà muntu mukwàbò kanà yònsò ewu. Muntu kampànda ùvwa wàmba ne Yèyè ùvwa ànu muntu wetù wa pàtupù ewu; mèmè ndi ngeela aci kadyòmbò. Yèyè ùvwa Nzambì. Kì cìvwàYe. Bwalu, kacya muntu nànsha umwe kààkaakulakù bu Yèyè to, muntu nànsha umwe kàvwakù mwà kwakula bu Yèyè to, bwalu Yèyè ùvwa Dìyì didì ne mwoyi Dyòdì diinè divwijìibwe mubidi, dimwèneshiibwa dyà kaabujimà kàà Nzambì.

<sup>97</sup> Nèngìitabè ne, bapròfetà abu bàvwa ne wàbò mukenji. Bàvwa naayi musangu awu; bàdi naayi mpindyewu. Kàdi apu pàvwa kaabujimà kàà Bunzambì mu mùshindù wà mubidi, kamwèneshiibwe mwaba awu. Yèyè ùvwa Nkààya, ne Yèyè ki Uvwa ukèngela bwà kukùngamangana ne cilumbù aci. Ne makolè Èndè manène ònsò àvwàYe naawù awu, kakùyi mpatà to Yèyè's ùvwa mufwànyine kwikala mfùmù wa buloba. S'ki cìikalàYe; ne Yèyè, bwà bansantu Bèndè, ki cidìYe mpindyewu.

<sup>98</sup> KwimanaYè mwaba awu. Mmuntu kaayi uvwakù mufwànyine kwikala mupèlè, kàyi ne mwaba wà Yèyè kutèeka mutù to; mumanyè menè ne mwaba wùvwà mushipa wùvwà muminè cìnjànjà cyà mfrangà awu? Nganyi, mmuntu kaayi uvwakù mwà kwangata milòndò minènè yà màyi ayi ne kuàndamuna mvinyò, kàdi kàyi ne mwaba wà kutèekaYè mutù? Bìvwa bikèngela kukùngamanganaYè ne majitu àvwa

maMupèèsha mu cyanza awu. Mmuntu kaayi uvwakù mwà kjujuula muntu mu lukità, paanyimà pàà yèyè mumanè kufwà munda mwà matùkù ànaayi ne mubolè?

Kàvwakù mwà kwikala muDisùngile Yèyè mwinè anyi? Bushùwà, Ûvwa mwà kucyènzà; kàdi bu Yèyè mucyènzè, nùnkù kī mMutùsùngile twètù to. Bìvwa bìkèngela kukùngamanganaYè ne majitu awu, ciinè aci bwà ditùmikila Dyèndè dyà Dìyì! Pàvwàbì ne, cishìkù cyà Adàmà aci, yèyè wàkangata kajila kàà cikòsò, njila wa dipweka ku—ku Taashìshì. Kàdi Yesù wàkangata njila wa ku Niinìwà, wa ku bàà Bisàmbà byà bendè, bwà kuDìpetela Mukàjì-musèla. Ndi ne disànkà mùdìYe mucyènzè, dilòlò edi. Bìvwa bìkèngela twètù kukùngamangana ne bulelèlè, bwà ne twètù tudi Bèndè Yèyè, kuumusha maalu a pa buloba. Amen!

<sup>99</sup> Bìvwa bìkèngela bwà muntu yònsò àkungamanganè ne cyòci aci, ewu udi ne bujitu bwà dyambulà kumpàlà kwà Nzambì awu. Tudi twangata anu, cileejilu, Noà. Ûvwa naabù. Noà, Mòsà, Eliyà, ne bakwàbò bònsò bàà—bàà cikondo ne cikondo cyònsò abu, byàkakèngela bwà kukùngamanganabò ne bujitu abu. Ne bìvwa bìkèngela bwà kucyènzabò, kàdi ki bwà cinyì bàvwa bàtùmiibwa mu díbà adi.

<sup>100</sup> Tàngilàayi Noà mu cikondo cyèndè cyà maalu à mamanya aci, mwàkamukèngelàbi bwà kukùngamanganayè ne cintu cìvwa kaciyi cyà maalu à mamanya amu. Mona's, kakùvwakù ka—ka—kabingilà kàvwà kènzà ne kacivwa cifwànyine kwikala kaciyi cyà maalu a mamanya to...Nwamònu's, ka—kacivwa cyà maalu a mamanya's wè, èyowà. Mòna's, bàvwa bàmba ne mvùla ùvwa mwà kulòka mu maulu. Kabàvwakù ne mvùla ùvwa mwà kulòka mu maulu to. Mpindyewu, byàkakèngela bwà kukùngamanganayè naaci's. Nzambì ùvwa mwambè ne mvùla ùvwa mwà kulòka. Ne pashìshe yèyè. . .

<sup>101</sup> Díbà adi diitabuuja didi kadiyi ne byenzedi ndifwè, wèwè wamba ne: “Ndi nciitabuuja,” kàdi kùyi wenza cyenzedi nànsha cimwè. Ànu mùdì Mukenji, wèwè wamba ne: “Ndi ngwitabuuja,” kùyi wenza cyenzedi to, bìdi ne dikwàcisha kaayi? Nwamònu anyi? Noà wàkaditwa mu mudimu ne nsandu wendè ne wàkiibaka bwàtù, bwà kushìndikayè cìvwàye wamba aci. Ki cidì cìtùkèngelà pèètù bwà kwenza ncyòci aci. Bidi bìkèngela tùdìtwè mu mudimu, bwà kujaaadika diitabuuja dyètù, ku byenzedi byètù. Byenzedi byètù mbidi bìjaadikà diitabuuja dyètù.

<sup>102</sup> Byàkakèngela bwà Mòsà kucyènzayè, ne byàkakèngela bwà Eliyà kucyènzayè. Byàkakèngela bwà muprofetà yònsò mu cikondo cyèndè kwimanayè ne kukùngamanganayè ne majitu aa. Kàdi bààbùngì bàà kùdìbo kabààkenza bu Yona to. Yèyè wàkanyema; bóbò kabààkanyema to.



103 Mònaayi: “Cilwishè ne mbilà mikolè.” Kaa, ekèlekèlè! Ki cyôci aci’s. Ki cyena-bwalu ncyôci aci: “Cilwishè ne mbilà mikolè.” Ki luseke lwà dikenkeci ndwôlò alu.

Kuya ànu kuntwaku ne kwambila bantu abu ne: “Twămbè ne, ndi mulwè bwà mêmè kuswikakana neenù nwênù balùmÿànà. Nudi bamanyè’s, ndi ngeela meeji ne nēnnwămbilè cingenzà. Ndi ànu ne kantu kakesè cyanàànà apa kândi ngeela meeji ne ndi mwà kukàvwija . . . kutufikishakù bônso pâmwè, ne kwenza *cikampànda*, *cikansanga*, anyi *cikankènga*.”

Kàdi, civwà ne: “Cilwishè ne mbilà mikolè,” pàdibi bikèngela bwà wèwè kulwisha cintu kampànda ne mbilà mikolè. Mpindyewu, bivwa bikèngela bwà kulwishayè byônso bivwa mintwamu ne mbilà mikolè; kulwisha cimenga ne mbilà mikolè, kulwisha midimu yàbò ne mbilà mikolè, kulwisha èkèleziyà wabò ne mbilà mikolè, kulwisha bapròfeta bààbò ne mbilà mikolè, kulwisha bambi bààbò, kulwisha baakwidi bààbò ne mbilà mikolè. “Cilwishè ne mbilà mikolè, cintu cyônso nkòong! Cilwishè ne mbilà mikolè!”

104 Noà wàkalwisha cikondo cyèndè ne mbilà mikolè. Bushùwà’s, ncyàkenzàye, kulwishayè èkèleziyà yà cikondo cyèndè.

Ncyà bushùwà ne Mòsà wàkatamba kulwisha cikondo cyèndè—cyèndè ne mbilà mikolè; bantu, baakwidi, ne bikwàbò. Wàkeela mbilà mu cipèlè mwônso amu. Mu ntwàngenu yônso, wàkeela mbilà, wèla ànu bantu mbilà kàyi ùlekelakù to.

Eliyà kàvwa mutàmbe kunangiibwa to mu ditùkù dyèndè, bwalu wàkalwisha cikondo aci ne mbilà mikolè. Mmùvwàye cyà bushùwà’s.

105 Yone Mubàtiji kàvwa mutàmbe kunangiibwa to mu cikondo cyèndè. Wàkalwisha cikondo cyèndè aci ne mbilà mikolè. Wàkambila mfùmù, mu—mulombodi wa—wa bukòokeshi bwalàbàle wa ditunga; ù—ùvwa ne, ùvwa musèle mukàji wa mwanààbò. Ùvwa ne cyà kuyiisha pa dibàkà ne difwà dyà dibàkà, mu dindà kampànda. Ki kucilwishayè ne mbilà mikolè, wamba ne: “Kí mbikùmbànàngane ne mikenji bwà wèwè kwikala nendè to.” Byàkamulomba, mutù wèndè bwà kuwùkòsabò, paanyimà, kàdi wàkeela mbilà mikolè ne wàkiimana ku mwaba wèndè wà mudimu.

Yèyè kààkangata màzuwà kuya ku Taashishì to, bwà kwamba ne: “Èè, nēntwe ku cyèbè, wèwè Helòdè. Bidi ànu bimpè. Bu mùdi wèla meeji ne yèyè awu mmukàji mulenga, mmukàji mulenga bwèbè wèwè, tungunukàaku.” Kaa, luse wè, mikùsù yà disukula naayi màlòngò ayi! Nudi numòna’s, èyowà, kantu ànu kakesè menemene, hmm! Mòna’s, s’ncyà disukula naaci ànu màlòngò a manyaanù.

106 Kàdi, mònaayi, Yone yèyè kàvwa mùshindù awu nànsha. Yèyè wàkakungamangana naaci. Wàkamba ne: “Kí

mbikùmbànàngàne ne mikenji bwà wêwè kwikala nendè nànsha.” Èyowà’s, mukalenge. Ki kucilwishayè mwimàne kamùngùlù.

<sup>107</sup> Bòbò kabààkanyeemakù to. Yone kààkanyeema to. Bààkiimana ne bààkakùngamangana ne maalu awu. Mòsà wàkateeta kunyeema, musangu kampànda, mwàkenzà Yona amu, kàdi Nzambi kumwaluja. Bààbùngi bààkateeta kuseesukakù; bàvwa mwà kubanga . . .

Kàdi, tàngilà, pìikalàbi ne Nzambi mmukubiikile, ne wêwè mutwishiiibwe ne Nzambi ùdi mu Mukenji, kakwèna cyàkupingajà cyànyimà to. Kacyàkakùdimuna Yona to. To, mukalenge.

<sup>108</sup> Amòsa wa kale awu, wàkeela lubilà lukolè, wàmba ne: “Ntambwe mmukungùle, udi kàyì mwà kuciina nganyi? Ne Nzambi mmwakùle, udi kàyì mwà kwamba cipròfetà nganyi?” Nganyi udi kàyì mwà kwamba cipròfetà, paùdi umòna Nzambi wàkula ne mwambè ne cintu kampànda necyènzekè, pààci cyènzeka?

<sup>109</sup> Ntambwe yèyè mukungùle, bantu bònso’s bàdi bàkwàcika bwòwà, èyowà’s, mukalenge, ní nukààdikù bamuumvwè ùkungula mu bisuku ne meetu. Udi mwà kuumvwa eyi yididila bu tumpuusù mu nsànji emu, ntambwe mitekesha ayi, kàdi bìvwa bikèngela wùmvwè mulelèlè, wa cisuku ùkungula musangu kampànda. Mabwe makesè neamatè ku kakùna aku, mu ntàntà wa mètres nkàmà yinaayi ne makùmi àsambòmbò. Ndi muswè kumòna kùdi mubyolu wònso awu wùfùmina mu bisùlùsùlù abi. Nènku yèyè ùdi ùpwekesha mutù, ùjuula bukuuyikuuyi abu; kacya ncitukù mwanjì kuumvwa cintu nànsha cimwè. . . Bu mùdì cì—cingoma cituuta, pàdiye ùbyola mukungulu munènè mu bisùlùsùlù byèndè apu. Nganyi udikù kàyì mufwànyine kukwàcika bwòwà?

Bàdi bàmba ne, ntambwe yèyèkù mukushebèye, kabyèna bìkusaama to. Yèyè ùdi ùkukwàcisha bwòwà bwà wamba kufwà kumpalà kwà kufikayè paùdi apu. Nwamònu’s, kwèna ucimanya to. Ùdi ùkukwàcisha bwòwà ku mukungulu munènè wa lwonji awu, kàdi ki yèyè ewu pwàà mu kasùnsukilà kàà kasunsa.

<sup>110</sup> Yèyè ne: “Ntambwe mmukungùle, udi kàyì mwà kukwàcika bwòwà nganyi? Ne Nzambi mmwakùle, udi kàyì mwà kwamba cipròfetà nganyi?” Paùdi umòna Nzambi wènza cintu kampànda, udi wamba . . . “Mémè ndi mufwànyine kwikala nciyi mupròfetà to. . .” Yona wàkamba. . . “Ndi mufwànyine kwikala nciyi mupròfetà, anyi mwànà wa mupròfetà to. Kàdi Nzambi mmwakùle, udi kàyì mwà kwamba cipròfetà nganyi?”

<sup>111</sup> Ndi mufwànyine kwikala nciyi mupròfetà, ndi mufwànyine kwikala nciyi *cikampànda*, *cikansanga*, anyi *cikankènga*. Pàndi mmòna Nzambi wènza cintu kampànda kanà cyònso, ne ncimòna kaaba aka mu Dìyì, ne Yèyè mucilayè, nganyi udi mwà

kushààla mupùwe ne mushààle mu cinyàànyà? Bushùwà's, Yèyè's mmucyènzè.

<sup>112</sup> Katwèna nànsha mwà kusokomena paanyimà pàà twitabààyi ne maabwobùmwe ònsò aa, kàdi kupweka ku—ku Taashìshì nànsha. Katwèna baswè kuya ne maabwobùmwe awu to.

<sup>113</sup> Kàdi bààbùngi, bu Adàmà, bàdi bènza cintu cìmwècìmwè aci, bàteeta kwenza mupinganyi mu mùshindù kampànda, bàteeta bwà kupeta njila wa dipàtukila, ne—ne kwenza mupinganyi kampànda, bwà kukùngamangana ne Nzambì. Paanyimà pàà yèyè mumanè kumanya cìvwà cibi, mukùngàmàngàne ne Bulelèlè, yèyè kulonda mukàjèndè ne kwenzayè ànu menemene cìvwà Nzambì mumwambile bwà kènji aci. Kàdi wàkatùngunuka buludi e kucyènzayè, nànsha byà munyì. Kì dìbà adi kudisanganayè butakà, mukàjèndè ne yèyè, bònsò bàbìdì, mu budimi bwà Edènà amu. Mésù àbò àkatàbala. Bààkamanya maalu mîmpè ne maalu mabì, dìbà adi. Kì pashìishe kuteetayè bwà kupeta mupinganyi, bwà kudìjikayè naawù mu mùshindù kampànda.

Mpindyewu, mbifwànàngane ne mutùdì twenza leelù ewu, kabingilà kàà twamba ne: “Èè, ndi nkwbambila's, bu ne pàvwa ng'apa,” anyì bu “*cikampànda*,” Anyì ne, “bu ne, bu ne, bu ne”! Aci's cìdì ànu... Nwamònu anyì? Kàdi udi ne cyà kukùngamangana naaci's. Anyì ncyà bushùwà anyì ncyà mafi. Ne bu cyòci cyà bushùwà, tùshaalàayi balamàtekù. Cyòci cyà mafi, umùkàku. Kì cyònsò cìdiku ncyòci aci. Angàtà cìdì... Jandùlè cìdì cyà bushùwà. Kì mbîmpè windilè kàbìdì to. Tùjandulàayi mpindyewu cìdì Bulelèlè ne cìdì cijaalàme, ne tùshaalàayi naaci. Tudi bamanyè ne ncilelèlè.

<sup>114</sup> Mpindyewu, tudi tusangana leelù ewu ne bantu bèètù bàdi menemene... Mbimwèke ànu bu ne meeji matòòke ònsò àkaadi muumùke mu maèkèlezìyà. Ndi... Mu... .

<sup>115</sup> Tudi basòmbèle mu nzùbu kuntu kwàka wa mwanèètù wa bakàji kampànda wa musinga mukolè utu ulwa ku èkèlezìyà ewu. Pàmwàpa mmusòmbe kaaba aka dilòòlò edi. Nènku mmutèekamù bèndè... bafucidi. Ne yèyè mmudileejè ànu ne kalolo kààbùngi kutùdì bwà nzùbu awu, bwà kutùlekelaku twangata nzùbu awu. Nènku ndi mufwànyìne kumutèèla mu dìnà, kàdi kì mmufwànyìne kwikala muswè bwà mèmè kucyènza to. Ne yèyè mmudileejè ànu ne kalolo kààbùngi kutùdì, èè, ncyà bushùwà ne katwèna bafwànyìne—bafwànyìne kumuleeja patòòke nànsha. Kàdi mmudileejè mukàji wa musinga mukolè be, wà menemene. Nènku mu nzùbu amu, mùvwa cisanji cyà bindidimbì ku luseke. Twètù tudi ne tuzùbù tukesè, tùbìdì, tutwàngàne.

Mèmè ndi ne dìkù dinène, ne musumbà wà bankònga, ne tudi... ne nudi—nudi bamanyè's, ne bikèngela bìikalè ne

malaàlù, ne miinè awu àbúngì. Ne bintu byònsò byungwija mushiki pampala apu, ne bikèngela wèndè upicila mu *bikampànda* ne upicila mu *bikansanga*, bwà kubwela ne kupàtuka.

<sup>116</sup> Ne pashiishe lwà kwàka nàka bàvwa ne cisanji cyà bindidimbi. Ne mu cisanji cyà bindidimbi eci, bânà aba bàya bwà kubandila, mu dyàlumingu mu dindà, ngimbilù wa tusàlà wa mùshindù kampànda uvwa upitakù. Nènku, nudi bamanyè's, s'mbi—s'mbifwànyine kwamba kukufwisha bundù; bu ne kakùvwakù bwena Kilistò bushùwashùwàlè mwaba kampànda bùdi mufwànyinekù kutwàpu byanza, bwà kumòna ciinè cidìbo bàbiikila ne mbwena Kilistò aci. Mòna's, mbimwèke ànu bu ne meeji matòòke ònsò mmamanè kupàtukamu. Mòna's, kabèèna, kabèèna bàmwèka bu bàdi naawù to. . . Mòna's, bidì ànu bikwàcisha ne bwòwà mùshindù wùdìbo biimànekù ne bàvunga màkofi ne bàlwangana muntu ne mukwèndè, kwòkù aku, kàdi kuteeta kwimba tusàlà ne bikwàbò byònsò mùshindù awu; ne kwenza minèkù yidì mwendeshi wa màzuwà a màyi mufwànyine kwenza ne lutàtu, ne kwamba bintu byà mùshindù yònsò, ne kwela bilèlè kàdi kutungunuka. Nudi bamanyè, bunsantu bwà—bwà bwena Kilistò bùkaadi bumwèke bu bujimije kaaba kààbù.

<sup>117</sup> Mpindyewu, ntu nya mu èkèleeziyà ne—ne mmòna mpaasàtà ùbànda mwaba awu ne ùmanyisha ne ne—nekwènzekè dinàyà dyà ditembangana dyà—dyà dyowela. Bantu bakàji bònsò mu tùpùtulù twà dyowa naatù màyi, bàyaaya bònsò kuntwaku. Nebàkenzé ditembangana kuntwaku; bantu bakàji aba, bòòwela's. Ne nebènzè kaa—kaafetè kàà mùshindù kampànda, ne nebàkalangè nzòlò bù—búngì cyanàànà, ne bànyà mubèlà, ne—ne bintu byònsò byà mùshindù awu abi. Bwànyì mèmè, aci's ncidì cyùmushà meeji matòòke mashùwashùwàlè mu bwena Kilistò; babàlekela bènza cintu kanà cyònsò.

<sup>118</sup> Nkààdikù mumòne, mu dilwa dyà kaaba aka, tusangana ne. . . Nudi bamanyè's, tusangana bânà bèètù bàà bakàji bààbúngì bavwàlè tùpùtulù, mu ditungà dyà mashika edi, kutàmba banùdi nusangana mu ditungà dyà luuyà lukolè dyàdyà. Nwamònu's, s'ncilelèlè. Mwàmwa mùdi luuyà lwà menemene amu, kabèènakù bààbúngì bàvwàlè tùpùtulù to. Kàdi muneemu, mùdi—mùdi mashika emu, mmùdìbo—mmùdìbo bàtùvwàlè. Nwamònu's, cidi, kabèèna bàjingulula ne dyabùlù ngudi wenza nàнку awu to. Nwamònu anyi? Mpindyewu, bu ne bìvwakù mbwà dicyankama, bu ne bìvwa mbwà kudyàmbulwishakù, nùnkù's mbwalu bukwbò. Bwà muntu mulùme, ndi ngeela meeji ne cidi cìmwèka cyà lùyòwayòwa pa muntu mulùme, kàdi—kàdi wèwè—wèwè kwèna—kwèna mufwànyinekù kutùma ntèma kùdi muntu mulùme to. Kàdi, inàbànà, wèndè—wèndè mubidi wòwù mmunsantu, ne yèye

ùdi ne cyà kuwùlama mùshindù awu. Kàdi pa kumòna bakùlumpè. . .

<sup>119</sup> Nudi mwà kumòna, bantu leelù ewu. Kùdi nyumà yìbìdì. Ne umwe wa kùdiyi n'Nyumà Mwímpè; mukwàbò nnyumà wa kàyi cijila, ne umwe mmukòòkesha kùdi cyòcì aci. Ne yònsò yìbìdì nyà butèndeleeedi. Mpindyewu, èyowà, ki luseke lùdì lùkèmesha ndwòlò alu's, yònsò yìbìdì nyà butèndeleeedi. Ne ànu mùvwà Esawù ne Yakòbò, bònsò batèndeleeedi; mùvwà Kaayinà ne Abèlè amu, bònsò batèndeleeedi; mùvwà Yudààsà ne Yesù amu, bònsò ntèndeleeelu, bònsò batèndeleeedi. Ne tudi tucimòna leelù ewu, nseke yònsò yìbìdì ayi, yà butèndeleeedi. Nwamònu's, nnyumà ànu umwèumwè awu. Bantu bàdi bàfwa, kàdi nyumà yèyè kèna ùfwa to. Ùdi yèyè ànu ùtùngunuka, yònsò yìbìdì yà butèndeleeedi ayi.

Umwe wa kùdìbo mmukwàta kùdi Nyumà Mwímpè, udi ne mùshindù wà nsòmbelu uvwa ukèngela kwikalayè nendè, ne kwenda ne difwànà dyà Nzambi ne meeji matòòke. Bòbò kì mbafwànyine kwibila dyeya dyèbè to, ne bàdi—bàdi bènza bintu byònsò ne meeji matòòke ne mwàbò mwònsò, bwà kukwambulwisha. Kàdi bakwàbò nebìikalè. . . Ànu ne musàngelue ne mwàbò mwònsò.

Kàdi bakwàbò abu, tudi tusangana ne, bìdì ànu cyanza mwamdamuna's. Kàdi, pààbì's, yònsò yìbìdì ayi nnyumà yà butèndeleeedi, bubìdì bwàyì; umwe, Nyumà Mwímpè; ne mukwàbò, nyumà wa pàtupù. Kàdi nwènù bamòne, necìikalè, nànsha mùdìbo bálàka mukana bàtèèla ntèndeleeelu amu, bòbò's nebàkusekè ne bàkwinyike mùdì munsantu mubùnguluki wa mu malaba. Bàdi bènza cintu kanà cyònsò cìdìbo mwà kwenza aci.

<sup>120</sup> Bòbò, bàdi bàlèngulula Dìyì dyà—dyà Nzambi dìdì kadiyi dishintuluka, byenzè bu ne kacya kaDìtukù difùndìibwe to.

Nwamònu's, wèwè udi mwà kwamba ne: “Mpindyewu, tàngilà kùneeku, pìikalàbì—pìikalàbì ne dibàtiiza. . .”

“Mémè ndi ne Nyumà Mwímpè!”

“Kàdi mwimàne mwaba awu ne cifwankà mu cyanza, munkaci mwà kucinwa anyì?”

“Èyowà's, mémè's ndi ne Nyumà Mwímpè! Mémè ncyèna ngeela meeji ne mbibì bwà kunwàku ndambù wa maalà to. Ncyèna ngeela meeji ne cìdì. . .” Nwamònu anyì?

Kàdi, nudikù bamòne: “Mémè ncyèna ngeela meeji”? Kàdi Nzambi's ùdi wèla meeji bishiilàngàne, nudi numòna's, bilondèshìle Dìyì Dyèndè. Nwamònu anyì? Nwamònu's, bàdi. . . Kàdi bàdi—bàdi ànu—ànu bàdi bàtwìlaPù matè's. Ncyà bushùwà menemene.

<sup>121</sup> Ànu mùvwà kaamuntu kàà cikalàbà kàvwà kalwè kènda kàkalaba musangu awu aku, pàvwà Davidì munkaci mwà kwipaciibwa mu nkwasà wendè wa butùmbi apu. Ùvwa wènda

ùbànda pa Mukùnà wà Olèvè, ùpàtuka, ùdila mwadi pavwàye wènda ùbànda apu, ùtàngila paanyimà. Ki kalúmyànà kàà kale aka kupàtukakù kwàka kènda kàkalaba ne kàmutwila matè. Ki mulami wèndè awu kwambayè ne: “Nènshiyè. . . kabwà kàka ne mutù ku nshìngù, kàtwila mfùmù wanyì matè anyì?”

Davidì kwambayè ne: “Mulekèlè.” Nwamònu’s, bàakamutwila matè.

<sup>122</sup> Paanyimà pàà bidimu bitwè ku nkàmà mwandamukùlù, bàakatwila pèndè Mwanèndè matè, Yesù Kilstò.

Ne leelù ewu bàdi bàMutwila cyàkàbidì matè. Byenzè bu ne kaCìvwa nànsha ànu. . . Kabàyi kaneemu, kabàyi bàmòna ne bwalu mbubàtàngìle, bàtùma ànu mpàla ku luseke ne bùùmukaKù, ne bàseka bakutàngìle mu mpàla. Bwà cinyì nànkù? Bàdi mu màzuwà batàngìle ku Taashìshì. Mmùdibi menemene.

Dibìikila dyà Nzambì edi, bìkèngela kwela mbilà mikolè bwà kulwisha bubì, kwela mbilà mikolè bwà kulwisha mpèkaatù, kwela mbilà mikolè bwà kulwisha bintu bidì bibì. Mpindyewu, vùlukàayi ne, ki cìikalàku.

Hê, nudi bamanyè, musangu ewu. Nudi bamanyè’s, ndi ne dishiilangana dyà mèbà àbidì. Kàdi mu Tucson tudi ànu dîbà mwandamutekètè ne tusunsa dikùmi cyanàànà, ne—ne nkàadi bu—nkàadi bu udi nciciyi pa mwaba wànyì to. Huh? Èyo.

<sup>123</sup> Mpindyewu vùlukàayi ne, netwikalè ne cyà kulumbulula bwà bwalu abu. Vùlukàayi ne, bàdi batwila Kilstò matè abu nebàlumbululè bwà bwalu abu.

Pààkaalukilà Davidì ùmuka ku diipaciibwa dyèndè adi, kùvwàye muyè wènda ùnyeema aku, ne pààkaalukilàye, vùlukàayi ne, mulúmyànà ewu wàkapòna kutwà mpàla panshì ne wàkeela lubilà lukolè ùlomba luse. Wàkatwila Davidì matè, pàvwàye ùpàtuka, kàdi ùkaavwa ànu pabwìpi ne kumusukula makàsà ne binsònji, piinè apu, mpààkaalukilàye.

Ne dîngà ditùkù aba bàakatùbulà Yesù abu nebàcìmònè.

Ne aba bàdi munkaci mwà kuMutùbula mpindyewu abu nebàcìmònè pààbò. Bòbò, dîngà ditùkù, necyàlukilè. Vùlukàayi, Bwàkabuulwibwà 22, Yèyè ùdi ùtùlòmba bwà twètù kulama Dìyì dyònsò didiYe mufùnde; Dìyì dyònsò.

<sup>124</sup> Mpindyewu tudi bamanyè ne Bwikadi Bwèndè bùdi kaaba aka. Mbushìndikiibwe. Tudi munkaci mwà kubùpeta. Tudi batwishìibwe ne, mu lumingu lùlwalwà elu, nebùtungunukè ànu ne kushìndikiibwa munkaci mwètù; babèèdi nebòndopiibwè, ne bintu binène nebìikalè byènzeka.

Twètù katwèna baswè mmwènenenu mwanýisha kùdì bònsò to. Tudi baswè Bulelèlè. Nènku twètù katwèna, tudi (baswè) katwèna baswè—katwèna baswè kukùngamangana ne cintu to ànu cidì Nzambì mwambè ne m’Bulelèlè aci. Kàdi: “Ikàlà

mutwishiiibwe ne mpèkaatù yèbè neyikupetè misangu yònsò.” Kayiyi mikupetè apa to, neyikupetè ku Cilumbulwidi. Pa nanku udi—udi . . . Neyikukwàtè mwaba kampànda, mpindyewu. Èyowà’s, mukalenge.

<sup>125</sup> Kàdi wêwè mwikalè mwena Kilistò mulelèlè, mubikidiibwe cyà bushùwà mwàkabikidiibwà Yona amu, Nzambi ùkaadi mumanè kufuta musinga wèbè wà lwendu. Tùùlukà mu màzuwà àyaaya ku Taashishi awu, nànsha bishi. Nzambi wàkadyànjlila kukulongolola ku mwoyi ewu. Èyowà’s, mukalenge. Wêwè mwikalè mwànà mulelèlè, mubiikila kùdi Nzambi, lwàku kùdi Kilistò. Bwelà mu kaabujimà Kèndè. Musinga wà lwendu lwèbè mmufuta too ne penyi? Mmufuta too ne ku Niiniwà, kî nnè ku Taashishi nànsha. Wêwè udi mudyànjlila kulongolola. Màzuwà èbè. . . Kùdi màzuwà miikàlè ùmuka patùdi twakulangana apa, àdi mu njila. Pa nanku kùdi cintu ànu cìmwèpelè cyà dyenza, nkubwelamù. Nènku bu ne wêwè uvwa bu Nzambi, kwàdyàkwikalakù mu ditalala to. . .

<sup>126</sup> Byenzè bu mwànà wa balùme mutekète wa mwanètù awu, katanci aka. Kwènji bidimu bitwè ku dikùmi mpindyewu, mmuyè wenda ùlalakana. Dindà kampànda ùdi ùya mu èkèleeziyà ewu, èkèleeziyà wa Kàtòlikè udi lwà kwinsi eku ewu, ne wàngata yèyè ewu bwa cidi taatù munsantu kampànda udiyè wàmba apa ewu, ne mukwàbò kampànda *apa*, ne mukwàbò kampànda *apa*. Biinè byònsò abi bìdi ne musinga kaayi? Nwamònu anyi? Mpindyewu yèyè ùcidi ànu ne nzala ne nyòtò. Mémè ne: “Mwaba wèbè nku cyoshelu kwàka, mwanàanyi wa balùme.” Nwamònu anyi?

Kakwèna mùshindù wà kupàtukamù to. Pàdi Nzambi ùlumbatangana neebè, s’mbipiciibwe ne wêwè mulekèlè kàdi kutùngunuka. Kwàjiki.

<sup>127</sup> Vùlukàayi, Nzambi! Èè, Nzambi ùvwa mu bwàtù amu. Nzambi ùvwa mu cipeepèlè cicolè aci. Nzambi ùvwa mu mushipa awu. Kwònsò kùvwàye ùkùdimukila, Nzambi ùvwakù.

Nwamònu’s, Nzambi ùdikù, ne necitungunukè ànu ne kulumbatangana neebè. Pa nanku bwà cinyi tudi twindila kàbidi? Tùbangàayi ànu ditàbuluja edi mu mùshindù mujaalàme. Cyà bushùwà! Udi mwindile cinyi? Tudi twitabuuja ne Dilwa dyà Mukalenge didi pabwipi, ne Yèyè neàpetè Mukàji-musèla, ne muDilongòlòle. Ne katwèna baswè màzuwà àyaaya ku Taashishi awu to. Twètù tuyàaya ku Niiniwà. Huh! Tuyàaya mu Butùmbi. Amen. Ncyà bushùwà. Twètù tuyàaya kwikalà Nzambi mwà kubènesha aku, ne ki citùdi baswè kwenza.

<sup>128</sup> Kudyàdija mu Bwikadi bwà Nzambi, dìbà adi, ne myoyi yètù; kî nnè byanza byètù, nangànangà to, kàdi myoyi yètù kumpàlā kwà Nzambi, too ne piikalàYe mutùtwishe mukèlè, munda ne paanyimà, mùshindù awu, ne nsèsà yà butùmbi Bwèndè, ne mulàmbe bwimpè Bwèndè—Bwèndè munda mwètù

ne mubobèshe citùdì naaci, mucìvwijè cilelèlà, nwamònu's, mu mùshindù wà twamòna mwà kuleeja bakwàbò ne Yesù Kilistò ùdì ne mwoyi. Kaa, ekèlekèle! Aci ki citùdì baswè kwitabuuja.

<sup>129</sup> Nènku vùlukàayi ne, kwàkayà Yona aku, Nzambi ùvwa mu bwàtù amu; Nzambi uvwa mu cipeepèle cicolè aci; Nzambi ùvwa mu mushipa awu. Ùvwa mutùngùnùke ànu ne kwikala mu lwendu alu ne Yona too ne mwàkenzekà diswà Dyèndè dipwàngàne. Ncyà bushùwà.

Ne Yèyè ànu mulumbàtàngàne neebè, wèwè udi mufwànyine kwepela *apa*, ne kwepela *pàapa*, kàdi newikalè mwena dikènga paùdì kùyi walukila ne wenza cintu cyùkaavwà mubangè kuMwenzela ku ntwàdijilu aci. Nwamònu anyi? Kùyi, kùnyeemi Bwikadi bwà Nzambi to. Kùngamanganà naabù. Udi witabuuja ne m'Bulelèlà, nàнку lekèlà... Cyôci ciikàle Bulelèlà, bìdì ne mushinga bwà kwikala ne mwoyi bwàci, kucifwila, cintu cikwàbò kanà cyònsò. Kàdi byôbì ne Yèyè ùkaadikù mukushindikileci ne, m'Bulelèlà, dībà adi katwèna mwà kucinyeema, kuya mwaba nànsha wùmwe to. Yèyè nèikalè ànu mwab'awu mene, mwomùmwe. Wèwè kwèna mwà kucinyeema to.

<sup>130</sup> Ku mupròfètà Wendè mulongolola, uvwa Yè mutèèke bwà kupweka mwómò amu ne kukòbola mukenji awu, mpindyewu, bìvwa bimwèke ànu bu ne Ùvwa mwà kwikala mutùme mupròfètà mukwàbò's, kàdi uvwa mutèèke Yona awu's n'Yèyè, ne nànsha Eliyà kàvwakù mufwànyine kwikala mwenzè to, Yelèmiyà kàvwa mufwànyine kwikala mwenzè to, Mòsà kàvwa mufwànyine kwikala mwenzè to, Yona nguvwa ukèngela bwà kuyayè ku Niiniwà. Ki cyònsò ciwàku pa bwalu abu. Yèyè nguvwa Yè mutùme ne mudimu ne mwambile bwà kuyayè. Nènku pàdiYe wàmba ne: "Ndà kuntwaku, Yona, ndà ku Niiniwà aku," muntu mukwàbò nànsha umwe kèna mwà kuya kenza aci to ànu Yona.

Nènku pàdì Nzambi ùkwambila cintu kampànda, bìdì bikèngela ùcyènzè; kì mmuntu mukwàbò nànsha umwe to. Nwamònu's, bikèngela ànu tükungamanganè naaci, ne tùye kacýenza.

<sup>131</sup> Tudi twitabuuja ne tudi ne mwoyi mu dībà didì Nzambi munkaci mwà kwenza cintu kampànda. Tudi twitabuuja ne tudi ne mwoyi munkacibò mwàwù mpindyewu. Ndi ngiitabuuja dilòòlò edi ne ndi nyiisha disangisha didì—didì didyàdije, dindile mwaba awu ànu bwà kubobadi. Ncyà bushuwa ne ndi—ndi ngiitabuuja nàнку, ne mwoyi wànyì wònsò. Ndi mufwànyine kwamba ne bìdì ànu byà mwomùmwe mpindyewu ànu mùtùbì misangu yònsò amu.

<sup>132</sup> Mpindyewu, tudi twitabuuja ne dībà dyàlu didì Yone Munsantu 14.12 ne cyà kuula. Twètù, tudi twitabuuja ne Maalàki 4 udi ne cyà kuula. Tudi twitabuuja ne Luuka 17.30 udi ne



cyà kuula. Tudi twitabuujja ne, bipròfeta byònsò byàkambàYe ebi nebyènzekè mu ditùkù edi. Tudi twitabuujja ne bidi ne cyà kuula, ne tudi twitabuujja ne tudi munkaci mwà kubimòna byùla mpindyewu mene. Aci ncyà bushùwà menemene.

<sup>133</sup> Lekèlè kunyeema. Kùùmuku mu Bwikadi Bwèndè to; seemènà wèwè ùbwele ànu mu Bwikadi Bwèndè. Ncyà bushùwà. Ne ndi mumanyè ne ki cinùdì nujinga kwenza. Bwalu, ndi mumòne bitaata byà màshinyi byà ku Texas pambèlù pàapa, ne byà ku Louisiane, ne byà myaba yònsò. Ki citùdì bavwilè kaaba aka ncyòci aci, kî mbwà kunyeema Bwikadi Bwèndè to, kàdi kunyeema kubwela mu Bwikadi Bwèndè.

Alùkìlè, tuulukà mu...[Katùpà kàà mukàbà wà mèyi munda mutupù—Muf.]...Pawikalà Yona, pawikalà wenda ulalakana bwà kukèba nî nnjila kaayi wa diya anyi nî ncinyi cyà dyenza, lwàku, bànda mu màzuwà pàmwe neetù dilòlò edi. Twètù tuyààya ku Taashishì, bwà kuya keela mbilà mikolè... anyi, ku Niinìwà, bwà kuya keela mbilà mikolè. Tudi tushiya màzuwà à ku Taashishì awu àya piikalàbi ne bóbò mbaswè kuyakù. Twètù tudi ne mudimu kumpàlè kwà Nzambi, wówò awu, m'Mukenji wutùdì bambwile bujitu.

<sup>134</sup> Pa nàнку mu lumingu lulwalwà elu, eci cidi ànu ntwàdijilu mukese dilòlò edi, bwà kunùmanyisha. Pàndi mèmè ngeela mbilà mikolè apa, ndi nkààyaanyì mwambùle bujitu bwà Mukenji, bàna bèètù. Nwènu bambi bàdi basòmbe mwab'ewu aba, ncyèna mwaba ewu bwà kunùtapa ku mwoyi nànsha. Ne nwènu bakàji ne balùme, mu bwalu ebu bwà dibàkà ne difwà dyà dibàkà bülwalwà ebu, ndi muswè bwà nùvulukè dilòlò edi. Ndi mwambè byònsò ebi, bwà kunùfikisha ku dyumvwa ne, ndi mwambùle bujitu ànu kumpàlè kwà Nzambi nkààyendè.

Ne pashìshe, kàbìdi, ndi mwambùle bujitu kumpàlè kwènu, bwà kunwàmbila Bulelèlè. Nènku ncyàkunwàmbila cintu nànsha cimwè to ànu Bulelèlè, pàdìbi ànu ne Nzambi ùdi ùmmanyisha cidi Bulelèlè. Pàndi ncìyi mumanyè Bulelèlè to, ncyàkwambapù cintu nànsha cimwè to, nwamonu's, ncyàkwambapù cintu nànsha cimwè to. Kàdi ndi bulelèlè ngiitabuujja ne Nzambi ùdi ùndeeja Bulelèlè pa *Dibàkà Nè Difwà Dyà Dibàkà*, ne ndi mutwìshìibwe ne Yèyè neàndekèlè mbùpàtùlè.

<sup>135</sup> Nènku Mayiisha makwàbò àndi ndumbila bwà kwangata mu lumingu elu, ngòwò aa: *Melekisedekè Ewu Nganyi? Mmwaba Kaayi Wùdì Nzambi Musungùle Bwà Kutèeka Dìna Dyèndè?* Ne ndambù wa bintu abi mùshindù awu, bìdi m'Mayiisha àlwalwà awu, ne *Bisaamà Byà Pa Kulela*. Ne—ne ndambù wa bintu, byà—byà mu mùshindù awu, bìdi bìtàngila *Muntu Mwikàle Ùsungula Mukàji Wa Kusèla*. Ne ndambù wa bintu, Mayiisha awu, ndi muswè kuàtwàla mu lumingu elu. Kàdi ndi muswè ànu bwà disangisha...

<sup>136</sup> Mwaba awu, kwôkò kufwànyine kwikala mwambi kampànda mwab'ewu; mèmè ncìtu mwab'ewu to, bânà bèètù. . . Ncyèna muswè bwà nwênù, anyi bàmwè bàà kunùdì nwênù bidimba, walùkìlà ku èkèleeziyà webè, wamba ne: "Mwanèètù Branham mmwambè *bikampànda* ne *bikansanga*" to.

Ndi mwena dibànza bwà Mukenji wùdi mumpà kùdi Nzambi wa Bukolè bwònsò. Pàndì mwimàne kaaba aka dilòlò edi apa, ne Nzambi mmumanyè ne ncilelèlè ne, kwìnshì ku musulu eku mene. . . Kùdi bantu, pàmwápa, basòmbe mwab'ewu, pàakapwekà Mwanjèlo wa Mukalenge awu kuntu kwàka ne mungambìle cyàkangambìlàYe aci, ànu pòpò apu mene mu cidimu cyà 1933 amu, ànu kwìnshì eku mu mùsèèsù wà Spring Street emu. Pawikalà mwenyi kaaba aka, angàtà kàshinyì pwekàku. Mmu disangu dyà Spring Street amu, mwaba wùdi ufikila ku musùlù, ki pààkenzekelàci mpòpò apu. Cìvwa mmu cidimu cyà 1933. Pàmwápa kùkaadi bidimu bitwè ku makùmi àsàtù ne bìbìdì, musangu awu. Kaa, kùkaadi bidimu makùmi àsàtù ne bì- . . . kùkaadi bidimu makùmi àsàtù ne bì- . . . makùmi àsàtù ne bìbìdì, kùkaadi bidimu makùmi àsàtù ne bìsàtù.

Ne mùshindù mwinè wùdiYe mutwàle cyòci aci, byònsò abi. Ki twètù kupàtuka, tutwàla Mukenji, ne tumòna babèèdì bòndopiibwa, mpofò, ne bikalàbà, ne balèmà, ne bilèmèndà, ne bikwàbò byònsò. Ne pashìishe kumòna mene ne bafwè, batùdì bamanyè ne bàvwa babàkenkète abu, bàbìika ku bafwè. Bantu bàfwa, ne bàbìishibwa cyàkàbìdì bàalukila ku mwoyi, ne bintu byònsò ebi. Mukenji wòwò mupàtùke, kùdi bimanyinu ne maalu a kukèma!

<sup>137</sup> Kàdi nucidì ànu numòna ngeelèlù umwèumwè wa meeji wa kale unùvwà babangè nèndè awu? Aci kacýàkafùmìna kùdi Nzambi to. Kabyèna bìkèngela ànu bwà Nzambi ènzè. . .

Nzambi ùdi ùteeta bwà kukòka ntèmà yènù ku Cintu kampànda.

<sup>138</sup> Ne díbà adi pàakapàtukà Yesù, Yèyè wàkabanga ne dyondopa dyà babèèdì, ne dýenza dyà byenzedi binène ne bikwàbò. Yèyè, misangu yònsò, Úvwa. . . Yesù wàkacyènta. Ne Mòsà ne Yesù bàakacyènta, ne bakwàbò bààbò abu. Nènku pàvwàYe pànwapa, Yèyè wàkacyènta.

Ne Yèyè udi munkaci mwà kucýènta, cintu cìmwècìmwè aci leelù ewu. PàdiYe ùtùma disangisha mùshindù awu, matàbuluja, ne ùbanga disangisha pa buloba, ùdi ùbanga kukwàta mudimu ne bimanyinu binène ebi ne maalu a kukèma. Kàdi díbà adi, panùdì numòna ngeelèlù wa meeji umwèumwè wa kale wa malongesha awu, wàlukila, kùdi—kùdi cintu cipampàlamuke mwaba kampànda. Kùdi cintu kampànda cipyacìpyà munkaci mwà kupàtuka! Pàakapàtukà Yesù, paanyimà, pàvwà. . .

139 “Yèyè n’Laabi wa maalu mîmpè.” Ûvwa mwà kuya mu cyambilu kanà cyònsò ne kuyiisha, pàvwàYe wòndopa babèèdi apu. Dìbà adi, kaa, bàvwa baswè kuMupeta mwaba awu.

Kàdi dîngà ditùkù pàakasòmbàYe, kwamba ne: “Mémè ne Taatù Wanyì tudì Umwe,” mwanèètu, Yèyè kàcivwa kàbìdi munangìibwe kùdi bònsò paanyimà pàà aci to. PàakambàYe ne: “Nwènu kanùyì badyè mubidi Wànyì, ne banwè Mashi Àànyì to, kanwèna ne Mwoyi munda mwènù to. Kàdi ewu udi udyà mubidi Wànyì, ne ùnwa Mashi Àànyì, ùdi ne Mwoyi wà kashidi; ne Mémè nèmubìishè ku lufù ku ditùkù dyà ndekeelu.” Dìbà adi, Kàvwa kabìdi munangìibwe kùdi bònsò to kacya ànu apu.

140 Kwambabò ne: “Ewu Muntu mmukishi munù wa mashi a bantu. Ewu Muntu m’Beelèzèbùlà. Mùshindù awu ngùvwàYe mwenzè bintu abi. Ûvwa mwà kwenza lubùkù. Ûvwa ùtàngila mu meeji àbò—àbò ne ùjingulula meeji àbò. Mmwena lubùkù.”

Kàdi, civwa ncinyì, Yèyè—Yèyè ùvwa Dìyì dyà Nzambi dimwènèshìibwe bwà dîbà adi. Nènku Ûvwa mwenzèjìibwe. KwambaYe ne: “Ntu ngenza misangu yònsò ànu cidì cisànkishà Taatù Wanyì.” Nzambi àtùkwàcishèku bwà kwenza cintu cìmwècìmwè aci, kwenza cidì cisànkishà Taatù.

141 Ne ndi ntèkemenà ne nwènù bònsò nenùmwè. Nwènù nubèngangana naanyì pa Mayiisha aa ne bikwàbò, nwavùlukaayi, nwikalààyikù nànsha ne kaneemu kàà ne, mémè ndi mwambùle bujitu, ne kùnyaaya kí nku Taashìshì to. Ndi mu njila mutàngile ku Niiniwà, ne bikèngela ngèlè—ngèlè mbilà mikolè. Mukalenge ànùbènèshèku bònsò.

Twinyikààyaaku mitù mpindyewu bwà katanci kakesè cyaanààna.

142 Tudi pabwìpi ne dîbà citèemà ne citùpà. Ncyèna muswè kunùlama to, kàdi ndi muswè kupeta eci ní ndi mwà kucìpeta, dilòòlò edi. Kùdikù muntu mwab’ewu udi—udi kàyi menemene mwaba wùvwàbi bikèngela bwà yèyè kwikala mu Kilstò, kàdi ù—ùjinga kwikalàmù, ne ùjinga kwikalàmù, udikù mwà kwela ànu cyaanza muulu cyaanààna anyì, wamba ne: “Mwanèètu Branham, nsambidilèku”? Nzambi ànùbènèshè, anjì tàngilàayi ànu byanza. “Ndi—ndi muswè. . . Ndi mwaba ewu, Mwanèètu Branham, bwà kutàmba kusemena pabwìpi ne Nzambi.”

Piikalà mutù wèbè mujuula, cyànyì—cyànyì cyaanza ncyela muulu, mémè pàanyì. Ki cìndi muvwilè mwab’ewu. Mémè ndi ne nzala, ànu mùdì wèwè naayi amu.

143 Kàdi, kaa, ditùkù adi, cìmwè cya ku bintu byà bitàmbe bunène ncyenzèke, ne ndi—ndi mumanye mpindyewu cidì cìkèngelà kwenza. Nènku ndi—ndi ndòmba bwà Nzambi anùpèèshèku dyumvwa ditòoke tòò adi. Didikù. Kùdi . . . Kwòkò lukonko mu meeji èbè, kùdi ne cyà kwikala dyandamuna mwaba kampànda, bwà kwandamuna ku lukonko alu. Dyànyì

disambila, ndyà ne, Nzambì àkufikishèku ku dimòna lukonko alu lwàndamunyiibwa mu dîbà edi.

<sup>144</sup> Pawikalà usaama, Nzambì àkwondòpèku. Netwènzè masangisha a dyondopa, ngeela meeji, pabwipi ne dilòòlò dyònsò, ne netùsambidilè babèèdi. Netwènzè cyònsò citùdiku mwà kwenza aci bwà kukukwàcisha, ne wèwè wènzèku cyònsò cyùdi mwà kwenza aci bwà kutùkwàcisha. Nèku netùkwatè mudimu pàmwè, batwishilbwe ne Nzambì nèatùpè disangisha dinène.

<sup>145</sup> Mpindyewu, Taatù Nzambì, tuumèyi tukesè tukòsòlòke etu, kàdi tùdi mu byanza Byèbè mpindyewu. Mukalenge, nyawù twàmbibù. Mémè nèngiikalè ne cyà kutwilangana naatù. Ànu bu. . . Mèyi awu kaènaku mwà kufwà to; àdi ànyunguluka ànu kunyunguluka buloba bujimà, makwàta pa mukàbà wà mèyi, ne dîngà ditùkù nèngiikalè ne cyà kùngamangana naawù mangaalùkidile buludì. Ndi njingulula cyòci eci, Mukalenge, ne ndi ncyàmba ne ndòndò wa meeji matòòke.

<sup>146</sup> Ndi ndòmba, Nzambì munanga, dilòòlò edi, bwà yònsò wa ku bânà Bèèbè aba. Nèku, Èyi Nzambì, ndi mutwishilbwe ne, kumpalà kwà lumingu kujikalù, bóbò ne—nebùmfwè ne, lukonko alu, lùdi lunène menemene mu meeji àbò dilòòlò edi alu, nelwikalè lwàndàmunyiibwe. Enzàku nànkù, Mukalenge.

<sup>147</sup> Kùdi bàmwè mwab'ewu bàdi kabàyi banjì kuKumanya to, Taatù, bu Musùngidi, too ne mpindyewu, anyi pàmwàpa kacya kabàyikù banjì kuujiibwa tètè ne Nyumà Mwímpè to. Swàku bwà dilòòlò edi diikalè dyòdi adi.

<sup>148</sup> Mukalenge, kí mmèmè udi mwà kuuja muntu ne Nyumà Mwímpè to; anyi mene udi mwà kusùngila muntu nànsha umwe to. Mémè ndi ànu mwà kubàmbila cyùdi Wèwè mwambè ne: “Bàà dyàkalenga ng'aba bàdi ne nzala ne nyòòtà yà bwakàne, bwalu bóbò nebùujiibwè.” Nèku ndi ndòmba, Nzambì, bwà Úfukèku nzala yà menemene mu myoyi yàbò.

Bààbùngì, Mukalenge, bikèngela bìkalekù ne nzala; mmunyi mùdibo mwà kwendesha tushinyi ntàntà wa kilòmèètà nkàmà ewu, baicila mu mabwe a mashika ne bikwàbò byònsò, ne pa mikùnà mùdi mvùla yilòka, ne mu bipèèlà, bwà kulwàbò ku kazùbù kakesè kàà kale kàdi kàsanganyiibwa mu disangu emu aka! Pashìishe ndi ngeela cyàkàbìdi meeji ne, Wèwè wákamba ne: “Mwaba wùdi Mubidi, ngwàsangilà mikankù.” Tùdiishèku, Mukalenge, ne Manà Èbè a Nzambì awu. Pèeshakù misùukà yètù cidì citùkèngelà menemene. Tudi ne nyòòtà Yèbè, Taatù. Tudi mu byanza Byèbè mpindyewu.

<sup>149</sup> Nyumà Mwímpè wa butùmbi uvwa mutùlùke pa mukùnà ditùkù adi kuntu kwàka awu, ndi ndòmba bwà Apacishèku patapata mwoyi ne mwoyi wònsò kaaba aka ne bwímpè ne luse Lwèndè, ne dyumwva. Tudi tujungulula, Taatù, ne ki cidì citùkèngela ncyòci aci, mbwà kuumwva. Bwalu twètù katùyi

bamanyè citùdì twenza to, díbà adi mmunyi mutwàmanya mwà kucyènzà? Kàdi tudi ne cyà kwikala ne dyumvwa. Mwàkambà Danyèlè ne, yèyè wàkapetela “dyumvwa ku Mifùndù yà mupròfetà Yelèmiyà.” Nènku, Taatù, twètù tudi tupetela dyumvwa ku Mifùndù yà Nyumà Mwìmpè, mùdiYe muswè kutùbuulwilaCì mu díbà edi. Tùpèèshèku, Mukalenge, majinga atùdì naawù Bwèbè Wèwè awu. Tudi tulòmba cyòcì eci ne musàngèelu wònsò, Taatù, bwà butùmbi Bwèbè, mu Dìnà dyà Yesù Kilistò.

<sup>150</sup> Mpindyewu ne mitù yètù miinyika. Pàdì mwanèètù wa bakàjì ùfla cyonà ne: “Yèyè neampèèshè ngàsà ne butùmbi, ne neèndè naanyi too ne ku ndekeelu.” Ndi muswè bwà nwenù kusambila mu cinyàànyà mpindyewu ne nùlombè Taatù wa mu Dyulu bwà Ànùpèèshèku, dilòòlò edi, cinùdì naaci dijinga aci.

<sup>151</sup> Mwanèètù wa balùme munanga, mwanèètù wa bakàjì munanga, Yèyè ùdi pabwìpì apu ànu mùdì dibòkò dyèbè pabwìpì neebè amu. Wèwè, ukàadi mungitabùùje mu—mu bikwàbò bintu, ngiitabùùjaaku mu eci. Yèyè ùdi kaaba aka bwà kukupèèsha cyònsò cyùdì naaci dijinga.

<sup>152</sup> Kaa, bwà mbingu mikesè eyi mvwa ne nzala yà dikèma, ne nyòòtà mikolè, ne majiyà à dikèma, a kunùmòna. Ki bwà cinyì ngákamba ne: “Billy, twàlukilè kumbèlu.”

Meda kwambayè ne: “Cyùdì uswila kwalukidila kuntwaku ncinyi, mu ditungà dyà mashikà dyàdyà, Bill? S’ùtu misangu yònsò ànu pa muminu pàkusaama ne bikwàbò byònsò. Utu misangu yònsò ànu upàtuka, ne cimpumpu cyà cìkusaamisha mutù, ne díyì dikupàta, kùcìyi mwà kwakula bipeepèle to.”

<sup>153</sup> Mèmè kwamba ne: “Èè, ncyèna mumanyè to.” Mèmè kumwambila. . . Nyewù mmòna mulundà wanyi, Charlie Cox, musòmbè paanyimà pààpa. Mèmè kwamba ne: “Ntu ngumvwa mwoyi wùzùka bwà kuumvwakù Charlie wàmba ne: ‘Kanshìndì kakesè aku nyawù kàbàndì ku mucì wàwa.’ Ntu ànu ngumvwa dijinga dikolè dyà kuumvwa aci.” Ntu—ntu ànu muswè bwà—muswè bwà kwikala ku luseke lwènù.

<sup>154</sup> Ndi mumanyè ne Mwanèètù wanyi Banks mmusaamè bikolè be. Ne mvwa mumumònè mu cìkèènà-kumòna, kaabaa aka ànu àbìdì àdì panshì aa, ne ùvwa mulààle cyàdì muulu. Ne ndi mumanye ne ùkaavwa ànu mwambè kushiyangana neetù, ànu matùkù makesè aa. Pàndì ntàngila bàkwàbò bashiilèshiiàngàne bàà kunùdì aku. . .

<sup>155</sup> Mvwa mulwè dilòòlò adi, mu disangisha dyà beena Kilistò bàà Kantu-ku-byanza, ne bàà buloba bujimà. Mukùlumpè “Papa” Shakarian, tatwèndè wa Demos, ùvwa ne ciibidilu cyà kusòmba mwaba wàwa mushààle ànu mutàngile too ne pàmvwà mbwela, pashìishe ùfukisha mimwemwe, ne dinkùpa dikesè dyà cyanza òvwaye wènza adi. Kàcìvwapù to. Ùkaavwa muyè.

Pashiishe kunkèngelabi bwà kulwa mu fàmiyè awu, ne EMU MMÙDÌ MUKALENGE WÀMBA, mwanèndè wa bakàji neikalè pèndè mwà kufwà. Florence, mvwa mumumòne mu cikèèna-kumòna, mumumòne ùya. Ne ndi mumanyè ne neikalè mwà kuya. Ki mèmè ne: “Sambilaayi, sambilaayi ànu cyanààna. Nudi bamanyè ne kùdi. . . Musangu kampànda bààkambila mupròfeta bwà kuya kambila mfùmù kampànda bwà kutèekayè nzùbù wendè mu bulongàme. Ki kusambilayè, ne Yèyè kulamina mwoyi wèndè, bidimu dikùmi ne bitaanu.” Mèmè ne: “Sambilaayi.”

<sup>156</sup> Kàdi, nudi nutàngila, ne mèmè—mèmè kwalukila. . . Mvwa musòmbe kaaba aka mu nzùbù wa didiila byàkudyà, ditùkù adi, mwikàle ndyà. Muntu kampànda kulwayè kùndi, kwambayè ne: “Kí ngwèwè Billy Branham anyi?”

Mèmè ne “Mmèmè.”

<sup>157</sup> Pàmwàpa kàvwa mummanyè to, mbwà eci cidi pa lusongo lwà mutù wànyì wà dibàla edi eci. Mvwa mwasè kalùmyànà kakesè kàà nsukì aka, bwà kubènga kusaama pa muminu mu disangisha edi.

Kuseemenayè kùndi, kwambayè ne: “Mvwa ngeela meeji ne mvwa mukumanyè, Billy.”

Mèmè ne: “Èyowà.” Mèmè ne: “Wèwè udi nganyì?”

Yèyè ne: “Mèmè ndi John Warman.”

Mèmè ne: “Zip ùdi bìshi?”

Yèyè ne: “Billy, yèyè’s ùkaadi mufwè.” Uh!

<sup>158</sup> Mvwa ngenda mpìcila mu nzùbù wa tubàdi; mèmè kupweka bwà kuya kafuta bitàdi byànyì. Pàmvwà mpìcila mu nzùbù wa tubàdi awu apu, ki inàbànza kampànda kungeelayè lubilà lukolè, wàmba ne: “Ukààvwa mumanyè ne John ùkaadi mufwè anyi?” Anyì, dínà kampànda. Ncifwànyìne kwikala kaciyi John to; Ed, anyì cintu kampànda. Ki mèmè kwamba. . . Ncìvwa mumanyè mukàji awu to. Mèmè kudyùmvwa mutàcishìibwe. Kàdi mèmè kufika ku dijandula ne, ncìvwa mumanyè ne ùvwa nganyì to.

Yèyè ne: “Udikù muvùlùke bufùkù kampànda bwà mîdimà pàvwà musulu mùle too ne ku myelelu mùneemu emu, ne nzùbu yìpweka ne màyi, lwà mu Mùsèèsù wà Chestnut mwàmwa, pawàkambà kujìmija mwoyi wèbè pa kubwela mu mwaba kampànda bwà kupàtulamù mukàji kampànda ne bânà bakesè apu anyi?”

Mèmè ne: “Ùvwa ngwèwè?”

<sup>159</sup> Yèyè ne: “Mèmè—mèmè’s ki inàbànza awu.” Wàkabanga kwela mbilà mikolè bwà mwanèndè wa mu dibòko; nudi bamanyè bwalu-bulonda bwànyì abu. Yèyè ne: “Ùmvwà mbiikila ne ‘mmwanànyì wa mu dibòko’ awu, ùkaadi musèlàngàne

ne mupetè ne dîkù.” Nwamònu anyi? Kàdi’s ki yéyè awu, mukùlákàje ne mutòlòke mvya; ne ki mèmè pàànyì ewu.

<sup>160</sup> Ku kàmwè ku kàmwè, twartà twètù tùdi ànu tùmushiibwa mu cibùmbù, mutùdi mwà kwamba’s. Ne tudi twenza masangisha, *ewu* ùmpangika, *wàwa* ùmpangika. Bìdi bikèngela bwà twètù bònsò kupangika, òmwè dyà ku matùkù àdi panshi aa.

Kàdi, mwanèètù wa balùme, mwanèètù wa bakàjì, kùdi Mwaba wà didisanga. Twikalàayi batwishibwe mpindyewu ne tudi mu bulelèlè. Mmwómò anyi? Kanùlekedikù dyumvwa dyètù dyònsò dyà Nzambi, ne bikwàbò, bìya mu cijèngù to. Twitabuujàayi.

<sup>161</sup> Taatù, bàdi mu byanza Byèbè. Mèmè ndi mu byanza Byèbè, Mukalenge. Tudi kaaba aka ànu bwà didilàmbula mpindyewu, kumpàlà kwà disangisha dilwalwà kubangadi màalabà dilòòlò. Udikù mwà kutùkwàcisha anyi, Mukalenge? Swàku bwà muyiiki wètù—wètù wikalè dîbà dyònsò ànu pa Wèwè! Swàku bwà myoyi yètù ne meeji ètù bìikalè biimanyikila pa Wèwè, ne Wèwè wàkamba ne Neùtùlamè mu ditalala dipwàngàne. Bààkafùnda kàbìdi mu Bible ne: “Kwikàdi mweyèmene dyumvwa dyèbè wèwè mwinè to.” Éyi Nzambi, katwèna baswè dyumvwa dyètù twètù nànsha; tudi baswè dyumvwa Dyèbè Wèwè. Tùpèèshèdi, Éyi Nzambi. Ne ditàbuluja dîbwelèku munda mwà misùùkà yètù mu mùshindù wà ne mushiki wà bantu ewu bìikalè ànu mwoyi wùmwè ne díyi òmwè. Enzàku nànkù, Taatù. Tùpèèshèku bintu ebi, patùdi tulòmba mu Dîna dyà Yesù Kilistò apa.

Too ne pààpetà musùùkà wànyì mwambwibwe  
awu  
Diikisha dyàmwàmwà dyà musùlù.

Mu nkùrusè, mu nkùrusè,  
Mwikalèku bwànyì butùmbi . . .

Twèlàayi byanza muulu.

. . . kashidi;  
Too ne pààpetà musùùkà wànyì mwambwibwe  
awu  
Diikisha dyàmwàmwà dyà musùlù.

Yesù, ndamèku mu nkùrusè,  
Kùdi mpokolo wa mushinga mukolè,  
Basùlùdìibwe ku . . . (Éyowà’s, Mukalenge,  
basùlùdìibwe). . . musùlù wà dyondopa,  
Wùtuuta nkòkà wùfùmina ku Mpokolo wa  
Kàlvaryò.

Mu nkùrusè, mu nkùrusè,  
Mwikalèku bwànyì butùmbi kashidi;

Too ne pààpeta musùùkà wànyì mwambwìbwe  
awu  
Diikisha dyàmwàmwà dyà musùlù.

<sup>162</sup> [Mwanèètù Branham ùdi wimbila mu matàma *Pabwìpì Nè Nkùrusè*—Muf.] Éyì Nzambì wa yààyà! Kwòkò bàmwè bàà kunùdi aku bàdyùmva baswè bwà kulwa kùneeku ne kutwà binù banyùngùlùkile cyoshelu, wèwè ànu muswè kulwa, ambà ne: “Ncyèna pa mwaba wùvwà wùkèngelà mèmè kwikala to, Mukalenge. Ndi—ndi muswè kwenza didilàmbula dyà cyàkàbìdi. Ndi muswè kudyènza dilòlò edi, Mukalenge.” Tudi baswè ulwa wèwè muswè. Netwikalè kaaba aka bwà kusambilakù pàmwè neebè.

Mu nkùrusè, mu nkùrusè,  
Kaa, mwìkalèku bwànyì butùmbi kashidi;  
Too ne pààpeta musùùkà wànyì mwambwìbwe  
awu  
Diikisha dyàmwàmwà dyà musùlù.

Yesù, ùndamè pabwìpì ne ku nkùrusè,  
Pàdi Mpokolo wa mushinga mukolè,  
Mufidiibwe cyanààna kùdi bònsò, musùlù wà  
dyondopa,  
Wùtuuta nkòkà wùfùmina ku Mpokolo wa  
Kàlvaryò.

Mu nkùrusè, mu nkùrusè,  
Mwìkalèku bwànyì butùmbi kashidi;  
Too ne pààpeta musùùkà wànyì mwambwìbwe  
awu  
Diikisha dyàmwàmwà dyà musùlù.

<sup>163</sup> Tùsambilàayi ànu cyanààna, muntu ne muntu mu wèndè mùshindù sungasunga mpindyewu. Pwàyikù ànu—ànu mwoyi díbà. Twìnyikàayi ànu mitu yètù mu Bwìkadi Bwèndè. Inábànzà mutekète, udi wela mbilà ne: “Ndi muKùnangè, Yesù!” ewu. Udi muvùlùke pawàkasungidiibwà, kùkaadi bidimu byàbùngì apu, udi muvùlùke mùvwà cyòci aci cyà kalolo kùdi anyi? Yèyè ùdi ànu wa kalolo nànkù dilòlò edi. Tùsambilàayi, muntu ne muntu mu wèndè mùshindù sungasunga mpindyewu. Tùdilambùlaayi ànu—tùdilambùlaayi ànu twètù bònsò kùdi Nzambì, biikale tùdilambùlaayi ànu twètù biinè cyàbìdi kùdi Mukalenge.

<sup>164</sup> Mukalenge Yesù munanga . . . [Katùpà kàà mukàbà wà mèyì munda mutupù—Muf.]

Musùlu wà bwànyì busàmbi bwònsò,  
Mutàmbe too ne mwoyi bwànyì mèmè,  
Ùndi nendè pa buloba pa kuumusha Wèwè  
nganyi?  
Anyi mu Dyulu pa kuumusha Wèwè nganyi?

Nzambì munanga, nyewù tulòmba mpindyewu bwà luse Lwèbè ne ngàsà bitumiibwè pa umwe ne umwe wa kutùdi,



Mukalenge. Tudi kaaba aka banyùngùlùkile cyoshelu. Bààbúngì kí mbafwanyine kubànda kùneeku to; Wèwè neùtwilanganè naabò ku myaba yidìbo basòmbe ayi aku. Cyònsò citùdì tulàmbula, Mukalenge, Wèwè udi muswè kucyàkidila. Twètù baKulàmbùle ànu díbà dyètù, Wèwè udi muswè kudyàkidila; dimanya, Wèwè udi muswè kudyàkidila. Kàdi, Mukalenge Nzambì, dilòòlò edi tuyààya kupita apu, tudi tulàmbula cyònsò citùdì. Cyònsò cìndiku mèmè aci, cyònsò cìndiku ntèkemena bwà kwikala, cyònsò cidi mu Wèwè, Mukalenge. Tudi tulòmba bwà Wàngatèku cyòcì eci, masambila ètù, ùàbwejè mu mwoyi Wèbè, Mukalenge, ne ùtùpèèshèku ndòndò munène wa Nyumà Mwímpè, bwà nsòmbelu yètù yishintulukè. Bwalu, tudi tumòna ne tudi mpindyewu pabwìpi ne ndekeelu. Kakwàkutàmba kunenga to. Ne patùdì tumòna bananga bèètù bènda bàpòna, ku ditùkù ne ku ditùkù, bàna ne bakolè, tudi bamanyè ne àbìdì aa cidi ne cyà kukookola ku cyètù ciibi. Nènku dilòòlò edi, Mukalenge, patùcidi ne meeji ètù mu òwò apa, basòmbe mwaba ewu, batwè binù mwab'ewu, anyì biimàne mwaba ewu, mùshindù wutùdì nànsha mwikàle wà bishi, twàkidilèku, Mukalenge Nzambì.

<sup>165</sup> Ngangàtèku, Mukalenge. Mèmè ncyèna cintu nànsha cimwè to, kàdi cyònsò cìndì aci, Mukalenge, Wèwè ní udikù mwà kukwàta naanyi mudimu kampànda, nyewù ndilàmbula mèmè mwinè Kùdì.

<sup>166</sup> Ndi ndòmba, Nzambì munanga, bwà yònsò wa ku bòbò aba. Bananga bàmvwà mukiimànyine ku mikùnà kwàka mu Arizona ne mudilè mwadi bwà bwalu bwàbò aba, s'ki bòbò aba batwè binu banyùngùlùkile cyoshelu pàmwè neetù dilòòlò edi, masambila, tulàmbula nsòmbelu yètù. Tudi baKunangè, Taatù, kutàmba nsòmbelu yètù. Tudi baKunangè kutàmba fàmiyè yètù. Tudi baKunangè kutàmba mukàjèètù, bàna, taatù, maamù, mwanèètù wa bakàji, mwanèètù wa balùme, bàyeètù, mukàjèètù. Tudi baKunangè, Mukalengè Yesù. Vwìjàku aci cilelèlà munda mwà myoyi yètù, Mukalenge. Pòngololàku maanyi a disànka, lumingu elu, Mukalenge, mu misùukà yètù. Twòwèshèku màyi, disukudiibwa dyà ne Dìyi, ku màyi a Dìyi, mwikàle utwàbanyina Bulelèlà.

<sup>167</sup> Bààbúngì kaaba aka dilòòlò edi, Mukalenge, ne biikalàku kaaba aka abu, bàdì bapetè cibwejàkàji pa byena-bwalu byà musinga mutàmbe bunène ebi. Èyi Nzambì, kàngulàku mpokolo awu mu nzùbù wa Nzambì, udi—udikù bwà kutùkezula awu. Ndi ndòmba, Nzambì, bwà Ùtùsukùlèku ne ùtùkezùlèku mu Mashì Èbè, ne ùtùvwìjèku bifùkiibwà bipyabìpyà. Ne tùpèèshèku ngàsà ne dikàndà, bwà kupàtula Dìyi dyà Bulelèlà mu dibuuludiibwà Dyàdì dyà kùdì Nzambì dyà Buumùntù bwà Yesù Kilistò.

Swàku bwà Yèyè àmweneke kumpalà kwètù, Mukalenge. Swàku bwà Àlwe ne òndopè mabèèdì ètù, àtufwilè luse ku

mpèkaatù yètù, ùjè myoyi yètù yìdì ne nzala ne nguumù milengà yà disànka dinène, Èvànjeeliyò mumwèneshiibwe mu nsòmbelu yètù.

Bèneshàku mpaasàtà yònsò, mulombodi yònsò wa misambu, mulongeshi yònsò wa kàlaasà kàà Dyàlumingu. Tùbèneshèku bònsò, pàmwè, Mukalenge, bwalu tudi baKunangè bulelèlà. Nènku mpindyewu tudi Bèèbè Wèwè, Mukalenge, mu didilàmbula edi. Mu Dîna dyà Yesù Kilstò, kwàtakù neetù mudimu mpindyewu bilondèshìle diswà Dyèbè Sungasunga.

Diitabuuja dyànyì nditàngile kuulu Kùdì,  
Wèwè Mwànà wa mùkòòkò wa Kàlvariyo,  
Éyì Musùngidi wa kùdì Nzambì;  
Mpindyewu ngumvwilèku pàndì nsambila apa,  
Umùshàku mpèkaatù wanyì yònsò,  
Éyì anyishàku bwà kuumukila ku leelù  
Mémè yònsò ngiikalè Webè!

Nudi banangè aci anyì? Twìmbààyi cyàkàbìdì.

Pàndì ngendela mu nyòngòlò wa mîdimà wa  
njila mibwelàkàne yà pànwapa apa,  
Ne pàdì lutàtù lùpaasalala lunnyungulukila,  
Kaa, Wèwè ikàlàku Mulombodi wanyì;  
Tùminàku mîdimà dîyì bwà yàndamukè  
muunyà,  
Kùpulàku binsònjì byà tunynganyinga,  
Anyì kùndekèdìku mpàmbuka  
Nya kule ne luseke Lwèbè nànsha.

Aci cìdikù cìnùfikisha ku didyùmvwa bilenga anyì?  
Mbanganyì bàtù banangè kwimba misambu yà kale ayi? Mémè  
ntu ànu muyinangè. Kàdì nwènù?

Kaa, tudi twenda tuyà batàngile ku Siònà,  
Siònà mulenga, mulenga kumòna;  
Tudi twenda tubànda batàngile ku Siònà,  
Cimenga cilenga kumòna cyà Nzambì aci.

Kaa, tudi twenda tuyà batàngile ku Siònà,  
Kaa, Siònà mulenga, mulenga kumòna;  
Tudi twenda tubànda batàngile ku Siònà,  
Cimenga cilenga kumòna cyà Nzambì aci.

Lwâyi, twètù bàdì banangè Mukalenge,  
Ne twenzààyi bwà masànkà ètù àmanyiibwè,  
Twìmbààyi pàmwè musambu ewu ne dîyì  
dìmwè,  
Twìmbààyi pàmwè musambu ewu ne dîyì  
dìmwè,  
Ne mùshindù awu tùnyungulukilààyi Nkwasa  
wa butùmbi,  
Ne mùshindù awu tùnyungulukilààyi . . .

Mpindyewu, tùjuukilàayi kuulu mpindyewu patùdi tuwimba apa. Labùlàngànaayi ku cyanza muntu ne mukwèndè.

. . . twenda tuya batàngile ku Siònà,

Àkubènèshè, mwanèètù wa bakàji! Àkubènèshè, mwanèètù wa bakàji! Àkubènèshè, mwanèètù wa balùme! Àkubènèshè, mwanèètù wa bakàji!

Cimenga cilenga kumòna cyà Nzambì aci.

Twèlààyaaku byanza muulu mpindyewu kùdì Nzambi.

Kaa, tudi twenda tuya batàngile ku Siònà,  
Siònà mulenga, mulenga kumòna;  
Tudi twenda tubànda batàngile ku Siònà,  
Cimenga cilenga kumòna cyà Nzambì aci.

Kaa, tudi twenda tuya batàngile ku Siònà,  
Kaa, Siònà mulenga, mulenga kumòna;  
Tudi twenda tubànda batàngile ku Siònà,  
Cimenga cilenga kumòna cyà Nzambì aci.

Aci kacỳènakù cìnùfikisha ku didyùmvwa bilenga anyi? Ekèlekèle, ekèlekèle! Kaa, twèlààyi ànu byanza muulu cyanààna ne tùmusaamùnaayi ànu mu mùshindù wètù wà sungasunga.

<sup>168</sup> Mukalenge Yesù, Wèwè Rose wa Shalònà, Mbata wa mu Cibanda, Mutootò Wùdi wùbàlakanà wà mu Dindà, Mutàmbe bulenga mu binunu dikùmi bwà musùukà wànyì. Wèwè Musùlù wà busàmbì bwànyì bwònsò, mutàmbe too ne mwoyi bwànyì mèmè! Mùshindù mwinè wutùdi baKunangè's wè! Tùmvwileku, Éyi Mukalenge. Mùshindù mwinè wutùdi tuKwela twasàkidila's wè! Kaa! [Katùpà kàà mukàbà wà mèyì munda mutupù—Muf.] Mùshindù mwinè wutùdi tuKutùmbisha's wè! Bèneshàku aba nùnkù, Mukalenge ne Musùngidi wetù wa mushinga mukolè! Fìlakù bintu ebi, Mukalenge. Twènzèlèku nànkù. . . ? . . .

. . . pabwìpì ne ku nkùrusè,  
Mwikalèku bwànyì butùmbi kashidi;  
Too ne pààpetà musùukà wànyì mwambwìbwe  
awu  
Diikisha dyàmwàmwà dyà musùlù.

<sup>169</sup> Mu mùshindù kampànda, anyi kansanga, ndi ndyùmvwa ànu ne tuyàaya. . . Kùdì cintu kampànda citèèka kumpalà kwètù mene. Mpindyewu, vùlukàayi ànu ne, ndi ngeela meeji ne ndi munkaci mwà kwamba cipròfetà. Disànka dinène nditèèka kumpala eku. Cìtábùùjaayi. Ncyà bushùwà. Myoyi yàbùngì yìdì mibungàmìjìibwe neyìvwìjìibwè. . . Maalu masokoka manène neàtookeshiibwè, ne bantu bàdì babungàme abu nebàshintulukè bàlwe bàà disànka.

Pabwîpì ne ku nkùrusè, mu nkùrusè,  
 Mwikalèku bwànyì butùmbi kashidi;  
 Too ne pààpetà musùùkà wànyì mwambwìbwe  
 awu  
 Diikisha dyàmwàmwà dyà musùlù.

<sup>170</sup> Bu Yone wa kale awu, pàakashààlàyè mutàmbe kukùlakaja bwà kuyiisha, ùvwa ànu ùshààla musòmbe wèla mbilà mikolè, mùdìbu bândondela, ne bukolè bwèndè bwònsò ne: “Bànà bakesè, nangàngànaayi muntu ne mukwèndè!” Nangàngànaayi muntu ne mukwèndè. Kanùlekedikù cintu nànsha cimwè cìlwa munkaci mwènù to, nwamònu’s. Sàkaayi byònsò, bintu byònsò kule neenù. . . Èyowà, nànsha ciikàle cinyi, kùngamanganàayi naaci. Tudi mu njila batàngile ku Niiniwà. Nwamònu anyi? Kanùbwedi mu màzuwà à kale à Taashìshì, àdì ànùpàtulà munkaci mwà balundà awu to. Tùtungunukàayi ne kwenda kubànda ne musùlù wà mabènesha a Nzambì awu. Mèmè ndi ngiitabuuja ne netuàpetè. Mèmè ndi ngiitabuuja Taatù wetù.

<sup>171</sup> Udi udyùmvwà bilenga mpindyewu anyi, mwanèètù wa bakàji? Abi mbìmpè. Mùshindù awu ki wùntù mèmè munangè kumòna bânà bàlediibwa, bàdi bàpita bàya dyàmwàmwa abu.

Ndi ànu ngeela meeji kùkaadi bidimu, ànu myaba eyi mene, mùvwà binunu byàbùngi bilediibwè mu Bukalenge bwà Nzambì, ànu mwaba ewu mene. Mùshindù mwinè wutùvwà katùyì nànsha bamanyè to, patùvwà biimàne kaaba aka ne tuumeeyà makùmi mwandamukùlù mu mpaayà, bwà kwibaka naatù èkelezìyà! Kaa, kwambaYè ne: “Mèmè Mukalenge ngudi mucikùne; Mèmè nèncìmyaminè màyi muunyà ne bufùku.” Ne Yèyè’s mmucyènzè. Yèyè mmucyènzè.

Nzambi ànùbenèshè. Mpindyewu patùdi twinyika mitù yètù apa. . .

<sup>172</sup> Mpindyewu, mààlabà dilòòlò, vùlukàayi ne, masangisha neènzekelè mu dibàlaasà dyà cìlongelu mwaba ewu. Ne byòbì ne. . . Netùteekè muntu kampànda kaaba aka mpindyewu, bwà kuleejayè bantu mwà kukùfika, bwalu beenyi nebìikalè bàlwamù.

<sup>173</sup> Nwènù baMunangè, ambàayi ne: “Amen.” [Disangisha didi dyàmba ne: “Amen.”—Muf.] Kaa, Yèyè kî mmulenga wa dikèma anyi?

<sup>174</sup> Mvwa mwimàne ku mwelelu wa màyi eku, ngimba musambu wà kale awu ne:

Ndi mwimàne ku mwelelu wà Yadènè kùdì  
 cipeepèlè cìkolè cituuta aku,

Elaayi meeji, aci kùkaadi bidimu makùmi àsàtù, makùmi àsàtù ne bisàtù, kùkaadi bidimu makùmi àsàtù ne bisàtù.

Ne ntàpa dísù dyà majiyà,  
 Ku Buloba bulenga kumòna ne bwà disànkà  
 bwà Kaanààna,  
 Kùdì bìdì bu byànyì bisanganyiibwa.

Nènku bààbùngì bàngààkabàtiizà, dilòòlò adi, bàdi mwômò amu mpindyewu. Musangu awu, bàvwa biimàne mwaba awu ne bààkadimwèna Mùtootò wà mu Dindà awu wùpweka wùmukila mu maulu, wùnyùnguluka mùshindù ewu, kwamba ne: “Ànu mùvwà Yone Mubàtiiji mutùmìibwe bwà kutwàla, bwà kudyànjidila dilwa dyà kumpàlà dyà Kilsto, Mukenji wèbè wèwè newùdyanjidilè Dilwa dyà cyàkàbìdì.” Bàvwakù bafwànyìne kucyèlèlè meeji kaayi? Kàdi, Mèyì ònsò a Nzambì mmalelèlè, Mèyì ònsò a Nzambì. Tudi ne mwoyi mu Bwikadi bwà Mfùmù munène. Nzambì ànùbènèshè.

<sup>175</sup> Patùdì twinyika mitù yètù apa, nèndombè Mwanèètù Neville, mpaasàtà wetù wa mushinga mukolè ewu, bwà kulwayè mwaba ewu bwà kutùtàngalaja mu disambila.

Nzambì àkubènèshè, Mwanèètù Neville.



*MUNTU ÛNYEEMA B̄WIKADI B̄WÀ MUKALENGE* LUA65-0217

(A Man Running From The Presence Of The Lord)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù dilòlò, mu matùkù 17 a ngondo mwibidi, cidimu cyà 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)